

藝文

八

揚眉公七十雙壽序

嘗讀小雅南山之詩其卒章曰樂只君子遐不黃耇又繼之曰樂只君子保艾爾後惟有公平豈弟之德足釀久遠無窮之休用能葆固真元流徽後嗣雖迹處煩囂莫不巖然有以自見予觀班史傳循吏謂宏舒諸人皆以儒術節吏治而當時用吏材卒史察舉如文翁朱邑者代更不乏其人至有明蘇州徐司馬晞太倉顧都憲佐俱以吏員躋七卿之列其子孫承廕皆至大官乃知奇人傑士躬樂只之行際明揚之會致身顯要爲宇內所推重是所固然卽如漢于公明孫一謙輩不于其躬必于其子孫古今所傳不可誣也予於揚眉翁廖老世伯深企慕焉翁少工儒業

能爲古文辭長而練習典章國故以才識見賞於前臬憲沈公考滿授今職蓋其爲人沈實而不露和靄而不爭與人排難解紛動必以正或干以私雖千金不少易其志也嘗有兄弟爭產構訟各欲致託于翁翁廉得其情持其短長而責以息訟且以友愛委曲開諭之兄弟皆感泣散去翁素豪飲又不喜狎邪遊干請者知不可賄動也思有以中之嘗集同人讌會飾美妓爲僮以行酒翁飛觴酬酢頽然大醉質明察之翁竟不知爲何如人其坦白率易胸無宿物又如此於戲學書不成去而學律求其不爲色昏不爲利誘能以豈弟行其公正如翁者有幾人哉翁年登古稀與阮太君鴻案相莊舉丈夫子五人諸孫十餘人其與

予以文章相交好者則其二嗣君太學生鳳昭也阮太君德性溫柔能婉順以承翁志長君昌昭榮登仕籍次君任昭與其季簡昭錦昭皆啣華佩實軒軒霞舉諸文孫亦次第見穎丁酉獻春翁之族屬將聯圖稱百壽之觴翁以宗老居前列適當表開一與阮太君爲雙壽之辰戚友之敬愛翁者更製屏以致其私祝而屬予爲序予念翁有樂只之德不減前史諸公知天之錫翁以黃耆以保艾者將于其子孫而貽翁以久遠無窮之休也并樂舉其軼事以侑翁其粲然而再飛一觴矣乎是爲序

乾隆四十二年歲次丁酉孟春上元穀旦

例授文林郎內閣撰文中書鄉進士年家眷姪溫聞源頓

南海廖維則堂家譜

卷二

藝文

二

首拜撰

樂賢公七十雙壽序

君子處世豈惟醇慤長厚與物無乖使鄉里稱善云爾哉必其材足以經紀世事而常有愛人利物之心以居之是故行一事而人服發一言而人從雖不得大展效於時而宗族藉以維持鄉閭交相仰重往往家頌而戶祝之而其人之享受多福期頤壽考亦理有所必然者樂賢翁世伯廖老先生稟西樵之秀氣作南邑之偉人少從尊人爲臬署吏慨然有利濟於人之志後尊人退就順德與刑名事翁念父勤勞一以身代熟習憲條深明律意輕重諸議多所平反案牘之疲非所恤也旣而次君亦一如翁之克承其考蓋三世處順前後近五十年邑人之陰承其德者衆

南海廖維則家譜

卷二

藝文

三

矣近退處西樵值

朝廷申明保甲通族尊爲族正通鄉推爲鄉正翁戒飭俗屬有道調和鄉黨有方時與諸紳老講求利弊倡爲維安保良義會而以會之餘貲宴高年於歲首凡鄉族中要務如脩宗廟廣家塾築圍基備賑荒勵節義振文風事事處置得宜口議之手成之此豈空文經世者可得同日語哉方翁之在順德也譚阮兩姓相鬪各持重禮請翁爲主翁兩諭之使結好而去又龍潭匪徒搶奪翁與其鄉老設法俾市中永守無虞蓋甯人息訟尤平日所兢兢在念以故人蒙其利而已亦受其休德配關太君孝順慈仁數十年中家庭上下悉能以禮相接於濟人利物之事亦頗知大

義自兩尊人以偕老遐齡而翁同產五人四過週甲兼以齊眉五令弟亦已逾艾家門之盛蘭玉敷榮或蜚聲璧水或振譽泮林羣孫雒頌之聲溢於閭表吾知翁之福慶未有涯也歲之正月爲翁暨太君雙壽佳辰合數之得年一百六十有奇戚友製錦稱觴求余一言爲贈余少與令弟廷階兄郁堂兄同學文酒過從於翁得忘年契知翁爲最深故不以不文辭書此以介一爵時

嘉慶四年歲次己未春王正月穀旦  
賜進士出身

敕授承德郎戶部陝西清吏司主事戊午科順天鄉試外  
簾官加一級紀錄一次年家眷世姪林紹光頓首拜

遇潛公八十壽序

樵山之東數十里有賀豐鄉焉大河環繞長堤擁護山川  
鍾靈代有偉人如五經廖謹簽事廖恂著於勝代者尙已  
遇潛翁者少年力學至老不倦隱居教授不求聞達余所  
識翁之門人最多往往道翁之行誼文章輒以不獲識韓  
爲恨適翁之季君蘭田兄勸吾邑幕恆勸人息爭解紛事  
多裨益邑人士咸愛重之且樂與之交一日攜翁之著作  
請余評覽余觀翁之文章器識豪邁局度安詳學養兼優  
之士竊歎皓首窮經懷寶未售迨觀其桃李則掇巍科負  
顯名著甚眾膝下蘭蓀環繞庭訓維嚴頭角崢嶸進未可  
量始知翁之樂自有在不重此身外物也其咏白沙碧玉

南海廖維則家譜

卷二

藝文

五

樓有十載憑欄思附驥春風沂水每悠然之句尤可見襟  
懷灑落其亦廖五經之流亞歟始信稱譽不虛矣今歲春  
值賓興典行邑紳士共舉翁爲鄉飲賓而翁適壽盈八表  
諸門徒戚友製屏稱祝屬余爲序余惟翁之性真自娛不  
爲境累不邀名譽卓然自立有非恆流所易窺者至如敬  
祖孝親教化子姪和睦鄉黨建立祖祠脩遷園竇種種隱  
德宜享厚福於無疆也夫積善餘慶理所必然翁今四代  
同堂子若孫皆恂雅樂善此日賓友躋堂獻觴其樂融融  
相與把酒論文吾知翁之意氣益壯當必暢然浮一大白  
矣是爲序

敕授文林郎原任惠州府教授歷署欽州學正徐聞縣訓

導兼管教諭專加三級年家愚弟梁元鐸頓首拜撰

南海廖維則堂家譜

卷二

藝文

六

炎亭公百齡開一雙壽序

記曰太上務德若好行其德有容心焉次也尼父日以其有餘以與人者仁人之儔也爰絲之稱季心劇孟曰緩急人所時有昏暮叩門不以親在爲解亡爲辭彼亦有足多者今之陽從數騎者有人大都聚而不能散孰能免焉文淵守財之譏乎炎亭翁早見及此其樂施與出於性生家世業儒州司馬翼堂公之次子也早慧有奇氣一試不售慨然曰丈夫貴自立從故紙中覓生活何以異於凡昔人云不爲良相則爲良醫未習岐黃書將何執吾其爲韓伯休乎由是販藥羊城以不二價致富其富也鄉里三族之貧者賴焉凡茲文閣祖祠社學橋梁道路荒歉賑卹每一善事翁必共爲倡舉翁原配羅孺人子一嗣伯兄繼室蔡孺人子三皆舉成均通仕籍孫曾林立四世一堂矣翁之行善也蔡孺人輒贊之婦德多吝說詩者所以重雞鳴之卒章孺人今年七十開四翁今年百齡開一夫能出其心力以濟眾者凡所知聞每食必祝之欲永其天年必有以庇廕我人欲天不違亦恆予之以壽翁以太學生 恩錫登仕郎亦可見翁得天之厚矣前丁酉鄉人爲聯壽如香山耆英故事翁與其列今歲復舉翁嬰鑠據右席而龐眉黃髮者頽然拜於下羣子姓斑衣舞綵承歡蔡孺人喜見顏色亦盛事也非攸好德孰能當此居近西樵名山鍾毓更十年當 賜昇平人瑞字樣爾時再爲翁酌大斗而進



康爵也謹序

嘉慶十六年歲次辛未閏月穀旦

賜進士出身

敕授儒林郎翰林院編修加一級年家眷弟劉彬華頓首  
拜撰

例授文林郎辛酉科解元候選知縣年家眷世姪吳梯頓  
首拜書

南海廖維則堂家譜

卷二

藝文

八

冲漢公九十壽序

今上御極之二十一年宏開

壽寓率土臚歡薄海內外之民無不沐浴涵濡共霑

聖澤適於是年冬月爲我兄冲漢翁九艷開一大慶其嗣孫瑤等爲之製錦稱觴屬予爲序以侑康爵竊惟上古之世堯舜行德其民仁壽其時俗尙淳龐無侈靡之習人心淳厚無詐虞之行是以天真不鑿均得享厥大年若冲漢翁者則居然有太古之風矣公世業儒父翔雲公積學不遇課徒數十年門下多知名士公少從學夙奉趨庭之訓旣乃躬耕於香山之野克儉克勤日久漸致殷裕晚卽退居鄉里援祖訓以垂誡諸孫務以耕讀爲事所建硯耕書南海廖維則家譜

卷二

藝文

九

舍數十椽欲使諸孫讀書其中勉紹前人之志也公性謹厚而真摯生平無疾言遽色待人必推誠布公有不肖默爲勸化之未嘗外彰其過更不與人爭利故交財之事公之喫虧處居多常教諸孫曰人能喫得小虧然後不至喫大虧於此見公立心之厚有大過人也公弟三人六符公爲邑名諸生今年七十餘怡堂甫田公亦務耕勤業皆年逾週甲一堂聚順皓首龐眉怡怡如也茲屆覽揆之辰適予謝夔府任在籍見其精力彌健神明不衰孫枝林立繞膝承歡各能仰守祖訓予得親與宗族戚誼共躋堂而進筭他年再宦成返里當爲公書人瑞字樣以彰我國家昇平介福之事豈不休哉是爲序

賜進士出身

誥授中憲大夫四川夔州府知府 欽命監督夔渝兩關

稅務前工部都水司郎中 欽差工部寶源局監督

京察一等加五級紀錄十次愚弟牲頓首拜撰

賜進士出身

敕授文林郎翰林院編修教習庶吉士 國史館纂修本

衙門撰文丁酉科順天鄉試同考官加三級紀錄五

次愚弟孔繼勳頓首拜書

東山公七十壽序

曾大父燦垣公與族祖揚眉公同掌族務大父玉堂公與族伯樂賢公及東山兄繼之而翱又與敬修姪少同遊長同學吾宗千餘人二家父兄子姪歲時過從休戚關切雖服屬之親無以過也翱少奉庭訓長聞鄉黨父老之論皆能言曾大父及先大父訓飭宗族爲善於鄉之事惜生己晚不及見揚眉公樂賢公在時翱纔弱冠未諳族務惟東山兄常從遊處每冬暮散館歸隨敬脩姪候問起居時聆教誨懇摯敦篤若親子弟焉兄識見諳練詞氣慷爽而與人謙和謹厚無乖忤之色繼其先人揚眉公樂賢公世爲順德掾吏一切案牘皆奉公守法不稍爲偏曲紳士呈請

南海廖維則家譜

卷二

藝文

七

地方利病宜興宜革之故必講求盡善力與成之不獨士民悅服卽上官亦倚以爲重及佐治香山一如在順德時翱前歲館隆都常過欵候見署中人皆捧案受教兄治文書手不停揮目不停視雖甚寒暑自朝至暮常至夜分自掾屬僚友以至鄉紳里正商賈負版皆云廖君廉潔勤慎樸誠篤實衙棹中真君子也夫德以積而必彰揚眉公及樂賢公陰行善事於署中而兄世濟其美其後之昌豈可復量今敬修姪及諸子弟皆醇樸謙謹有祖父風家業之隆且蒸蒸日上兄復老而益壯康強逢吉此可見爲善獲報之徵刑名案牘中未嘗不可修行積福矣今歲兄六十有九適族人聯壽之舉戚友爲兄製屏稱祝屬翱一言

以侑兄觴翺於兄素密邇不復爲文飾故舉前世之積累  
及兄生平所抱負而質言之翺方出宰山西使得如兄者  
以爲之佐何憂事之不治惜兄春秋高不復遠出然兄精  
神矍鑠雖年薄七十常如五十許人翺他日宦成而歸將  
舉居官治事臨民御衆之道以就正於兄別且在邇願先  
進一觴以爲兄壽兄將何以教之

賜進士出身分發山西卽用知縣己卯科解元愚弟翺頓  
首拜撰

怡堂翁七十壽序

人必有恢廓之鴻圖而後能發名成業亦必歷歲年之久遠而後能厚積宏儲然非精神振拔奮發有爲始終不懈未易臻此若吾怡堂翁四兄大人庶幾近之翁少就庭訓知才力不逮乃棄儒歸農携數百金走香山耕稼察地利詳物產測天時學稼學圃以歲以年種樹如郭橐駝之法耕植合齊民要術之篇以故奴婢千頭篝車滿載翁或顧而色喜乎翁歲時每歸享祀恆相過從談論不輟吾兄弟未嘗不壯其爲人從兄簡居公慨託以數千金使經營措置十數年後捧璧以歸然後知翁前此之未甚喜形於色者其器量固自深遠也然翁非徒自爲計凡鄉族中之疑

難者無不力爲承當 大祖典嘗有在香山者歲收皆經其手典主叔嫂互爭遽趨搶割翁適察知其事押禾艇赴縣署召集族眾往控維持調護卒以得復皆多翁之力也歲甲辰水決西圍基屬翁鄉份無敢任者時晚蒔催迫翁乃設法籌畫任勞任怨事成猶多不韙之言余謂翁所捐實浮於數尙責其一 一悉當耶華元興役之謗有自來矣翁兄弟四人多以田畷起家獨三六符兄名在庠序翁父翔雲公耕讀以老翁養親敬兄無少忤此豈僅以農人目之哉漢制有孝弟力田科非翁其誰與屬今之貢名成均不過少酌其志耳翁性儉樸內嚴厲而外謙和遇其人無不雍容禮接非其人則聲色相加終身一大布之衣望而

知爲深藏若虛者也嘗擬一聯云四十載稼穡勤勞東走西奔未了生平事業索諸文人屬對吾謂翁第書此語懸諸座隅垂訓後人使時常思索足知前人艱苦也今春爲翁七十攬揆之辰諸昆弟製屏稱祝翁瞿然起謝不敢當余執爵而言曰古者六十歸田今翁七十有進可以杖履優游於鄉井間矣撫桑柘之餘閒話胼胝之舊事其亦可以引滿一觴已乎是爲序

例授文林郎揀選縣知縣辛卯 恩科舉人愚弟灼頓首拜撰

賜進士出身禮部儀制司主事通家弟陳其銀頓首拜書

星垣姪七十開一壽

嘗讀漢馬援傳述其從弟馬少游之言曰士生一世但取衣食裁足鄉里稱善人斯可矣若求贏餘徒自苦耳如吾姪星垣者非今日之馬少游乎非鄉里之所稱善人者乎星垣素謹愿樸儉不喜奢華習卓亭公取以爲繼孫性孝友處家庭無間言卓亭公遺有資產其同父兄弟輒借權子母竟折去大半無怨言仍友愛如故重義輕財有所貸助於人從未聞有責負事曰彼實無餘安能償我其立心之厚常人所不及也夫耄耋德色箕帚諄語風俗之積久矣若星垣者不亦可以愧勵末俗也乎余未遇時授徒鄉里與相親愛不啻同胞好藝菊與予同癖每年值菊百十

南海廖維則家譜

卷二

藝文

五

本親抱甕灌溉相賞相樂怡怡如也迨余游宦京師因道遠不能迎養爲余經理家事無不周至或值吾家有要需適其囊又告罄每潛質衣於典以濟其乏竟不使吾家知之使吾廿餘年無內顧憂者皆星垣力也道光辛丑余以禮歸合出資築依園一所園有庭榭廊檻幽室池沼花木之勝三年之內與星垣朝夕聚首風雨聯床飲食與共今余再守豫中星垣仍寓居依園廣栽花竹以待余歸計已酉之春爲星垣七十開一大慶聞其精神矍鑠眠食無恙善調養無聲色嗜好以戕其生傳曰天道無親惟與善人若星垣者不獨其善養足致期頤而行善旣多必膺天慶享厚福昭德彌年正未有义子二人孫一人謹愿皆有父



風吾知其後必大有昌其家者星垣又必能及其身親見  
之也茲宗族親戚欲爲星垣稱觴進兕予未及返里特寄  
卮言以敘其事

賜進士出身知河南汝寧府事從叔牲謹序并祝

鑑湖翁六十雙壽序

稱觴上壽由來舊矣鄉里小民縉紳子弟苟欲伸其愛日之忱莫不願烹羊酌兕以爲父母歡然往往杖國杖鄉而夷考其人曾無有致壽之實則雖壽其幸也不可謂其壽也夫古之稱壽者或本諸大德之由或歸諸仁者之效從知椿榮萱茂慶洽庭幃固生人至樂之事然必其人實有可以致壽之理而後迎祥迂祐始爲壽其所當壽而非幸而致也封翁廖君鑑湖余畏友也憶自庚寅之歲聚首都門晨夕過從者垂五六年而聆君之讜論忠言觀君之居心行己非卓然有得於中不及此昔嘗竊嘆君之爲人知天必有以厚之也自後君治裝遶余羈薄宦薊雲嶺樹相南海廖維則堂叢譜

卷二

藝文

七

違晨夕者又閱幾霜而君之嘉言懿行未嘗一日去諸懷時復鴻使南來箴規彌切且知君之強健如昔爲可慰也今歲春君長君夢生赴試禮闈來謁余且言君與德配李孺人花甲並周欲製屏稱祝而問序於余余惟君之生平聰明內藏而渾而不露此壽根也和平外著而淡而無爭此壽徵也剛直而不阿則生理能全也寬厚而愛人則福基彌厚也若夫涵今茹古發爲詩歌則又其識力之精而悉出以忠厚之旨蓋駸駸乎壽世之文焉凡此者皆君之實行而余之所深知宜乎得天之厚而壽其所當壽果非幸而致也至君遠客京華星霜屢易孺人力持門戶教子成名使君萬里天涯無虞內顧則君得於內助之賢又可知宜

其與君並享遐齡而大膺景福也乎他日者余宦成歸里  
行將載酒登堂爲君暨孺人祝百齡雙慶且與君敘數十  
年之契濶聯七千里之舊交知星聚春濃其歡會當有倍  
於茲者則今日之舉殆其始事焉耳遂欣然而爲之序  
道光辛丑年十月 穀旦

賜進士出身

誥授奉政大夫工科給事中掌江南道監察御史兼稽查  
銀庫事務翰林院編修加五級年姻愚弟駱秉章頓  
首拜撰

賜進士出身

誥授奉直大夫翰林院侍講右春坊右中允戊戌科會試

南海履維則堂家譜

卷二

藝文

六

同考官己亥科廣東鄉試正考官加三級通家愚弟  
張芾頓首拜書

南屏翁六十雙壽序

余自髫齡時與南屏翁及其弟秋藻翁從學於先君子數年迄今各皆皤然老矣其間過從樂數晨夕數十年如一日今春南屏翁暨元配周孺人爲週甲攬揆之晨諸戚友製屏稱祝屬余一言爲序余與翁知愛最深不敢以不文辭夫人安常處順退居鄉里無瓌節奇行以自表見僅乃與時偃仰以全其天斯亦何以稱焉然而庸德之難能而可貴也世所稱鄉里善人者必臚舉其造橋修路費若干賑濟存活人若干又其甚者讓產數千金是皆卓卓可紀翁以少年秉家凡諸伯兄長所樂爲者相與繼踵故隨在而舉之亦隨在而忘之此皆其家之隱德積累固然其無

南海廖維則家譜

卷二

藝文

九

足異而亦無俟余之覩縷也翁性和易坦率與人無忤見人之不善事之不協者必肫肫篤篤語刺刺不休引以爲子姪戒遇誠樸篤實之士又必懇欵流連惟恐其或去所謂見善若鶩嫉惡若讐者非耶翁嘗謂吾質魯不能習制舉業得貢名成均足矣吾將以此事勉吾弟今秋藻翁果獲雋房首亦云吾兄鞭策之力爲多猶子少孤慇懃鞠育至於成立凡諸子弟姪視同一體用愛用勞有加無已何其性情之篤摯也生平寡所嗜好不飲酒不置姬妾不理俗務與周孺人相敬如賓諸務一委於弟故得以遂其優游之樂居恆喜以方藥濟人斯數者皆所以致壽之道也余於是執爵而言曰交道以貌不以實處世以文不以質

公則真誠不漓性情不汨皆今人之所棄而昔賢所不忽  
吾故深服吾之老友用以敬告翁之諸子姪  
例授修職郎卽用教諭署四會縣儒學歲貢生愚弟馮昭

祖頓首拜撰

南海廖維則堂家譜

卷二

藝文

二十

鹿儕翁六十雙壽序

鹿儕太守與余生同邑長同榜其官於朝也又同邸舍自君出守夔始與君別別來忽忽垂十載矣今年夏長君雲臺來應京兆試備述堂上起居綰綽聰明齒髮不少衰因索予一言為壽余齒少於君自慙蒲柳蒙

恩給假養疴而君典守大郡治繁理劇神明完固人謂君攝養有素惟予知君致壽之由也夫人當少壯時處豫順之境日饜膏梁筋骨柔脆比歷仕宦則又營營於名利之途得失惶惑心氣摧耗歐陽子所謂有動於中必搖其精欲長保其金石之質得耶君少孤攻苦力學動心忍性有能人之所不能者顧曠達不屑屑以處因為念嘗除夕糗

南海廖維則家譜

卷二

藝文

三

盤幾不具躡芒屨懷樽飭徒步遊西樵山登高放歌四顧無侶其胸次為何如哉洎成進士官水部浮沈郎署逾二十載其同捷者已陟台司膺顯秩以去君夷然泰然退食之暇素琴一張濁酒一壺獨坐自遣泊如也性愛菊每躬蒔數十百本庭除几席間幾滿位置高下秉燭顧影別有會心余日至其齋悠然相對忘其身在輭紅中也又嗜硯成癖聞有佳品不惜重直購之嘗得西洞無上品摩挲不釋手輿到濡毫臨坡公書盈數幅瀟灑豪逸之致流露楮墨間有上官欲觀之矢以勿奪然後出吁雖襄陽無以過也余顧謂君石之貞耶菊之逸耶君兼而嗜之其他年壽徵耶蓋自其前言之其守堅堅則本體無所虧自其後言

之其性澹澹則外物不能奪此君之所以葆其性真而引  
年未艾也抑余又聞之君之在夔也勤撫卹寬商旅惠政  
不勝書近守汝南汝之民無不呼為召杜

聖天子子惠元元綜覈吏治凡循績之卓越者無不書  
之屏展擢為封圻則頌聲之作當不止在汝瀆江漢間矣  
此又君之德澤施於民而康彊其身以及其子孫者更可  
操券得也馮恭人賢達明智在閨中已負人倫鑒迨歸君  
事親盡孝君之久宦京師無內顧憂者皆恭人力也尤能  
逮下有周南樛木風近偕君居郡署金絲召和蘭玉成列  
一室之中雍雍怡怡天倫樂事無過於是關辰臣少府與  
吾兩人交最密曩者佐余在關中君之于夔于汝又偕展  
序

道光 年 月 日  
賜進士及第

誥授光祿大夫工部左侍郎加三級前署工部右侍郎兼

管錢法堂事務內閣學士兼禮部侍郎詹事府詹事

通政司副使翰林院侍讀學士侍講學士左春坊左

庶子翰林院編修年愚弟羅文俊頓首拜撰并書

鹿儕郡伯六旬壽序

蓋聞蓬島嶙峋鳥篆著葛仙之籍霞杯激灑鴛漿剡廖井  
之泉五岳圖開燭榮光於燕寢十洲賦就浮瑞氣於虎符  
爭傳傳說之星辰合儷彭篔之歲月自署養生之印何須  
駐景之文宜其耀祥麟威鳳之名而膺緝福曼齡之慶也  
惟我鹿儕郡伯大人夙耽敷淡幼卽岐嶷驚百藥之神童  
古書在口誦十華之靈簡玉券留胸風雨夜牀得子瞻以  
授學池塘春草偕靈運而聯吟擅彩筆之一枝江常入夢  
任黃鸝之三請董不窺園宜其連接巍科榮登上第毛遂  
之囊脫穎雷煥之劍騰光已聯工正之班並屬文思之院  
著聲華於日下粉署香凝表卓犖之風標玉珂花映績屢

南海履維則堂篆譜

卷二

藝文

三

登夫上考譽早動於中朝劍閣峯青看一麾之出守蜀  
江水碧羨五馬之榮膺爭迎郭伋之輿攜琴挈鶴共拜宋  
均之政灑潤飛甘俗尙買牛龔遂能報三年之績才方展驥  
士元原非百里之才而且履廣萬千汲引悉成薰燧政同  
六一振拔盡是單寒至若酒載瞿塘賞錦江之春色詩題  
人日尋杜甫之草堂白帝城高風月載其吟舫黃金臺遠  
烟霞寄之錦囊節操乃不惠不夷出處則亦仕亦隱棠栽  
遺愛花種可離正宜秩晉升華不意言旋讀禮陸智初幼  
多至性橘常懷於袖中吳隱之毀不勝哀鶴爲來於庭下  
念茲孝筭敢廢忠葵儲霖雨於東山謝安再出迓

絲綸於



北闕山甫初來昔溥鴻膏系去思於赤甲今移蜺節歌來  
暮於天中從此鵝池石畔烟波悉是恩波應教雞黍臺邊  
柳蔭皆成樾蔭竚看羅蘭馥郁待發孫枝已知謝桂芬芳  
早培寶樹煌煌德門之慶壽世之華海內榮之人倫墜之  
斯固誰昔挾風雲之氣巍然如神仙中人矣霖等幸庇大  
雲自慙小草忝屬同舟之誼彌欽卿月之暉茲逢攬揆良  
辰宜進齊眉佳餉介嘏奏南飛之曲宵雅肄三消寒開北  
海之尊新圖數九好催梅信齊開五出之花願祝朝暉永  
護千春之樹

誥授奉政大夫 欽加陞銜 賞戴花翎 特授河南汝

寧府汝南埠糧捕水利通判加五級紀錄十次寅晚

南海慶維則堂家譜

卷二

藝文

三

生文霖頓首拜撰

敕授承德郎 特授河南汝寧府新息分防通判加三級  
紀錄五次鄉晚生徐繼鏞頓首拜書

鹿儕太守六秩壽序

嶺南環山而瀕海百物駢溢瓌璋奇麗爛然大都會也而鹿儕太守生長讀書于其間城市巖壑刻苦堅勵視世之被統逐綺者泊然也迨通藉官水部郎精覈勤謹歷官十餘年之久蕭然如未遇時其後出典大郡約思儉行瘠己肥物蕭然如官京師時其于熱形勢弋聲利以仕宦爲恣睢者夷然也是蓋學道有以平其心故其氣之貞固而不搖而外物不足以奪之也歲在癸卯鹿儕奉

天子命守汝南余嘗以公事涖汝鹿儕觴余于南湖烟水澹宕林樹蒼然酒酣爲言其少壯時事甚悉大率睦宗族恤鄉黨倡義舉而陰行善事居多及其守夔州也訪十賢

南海廖維則堂家譜

卷二

藝文

三

堂武侯廟杜甫宅登白鹽赤甲之崔巍攬瞿塘濼瀨之洶湧以爲夔俗淳簡治夔易于治汝汝習剽勁急疾非以詩書柔其心羽籥馴其氣漸漬寢淫不足以易其俗余聆其言而躓之故鹿儕拳拳以興學校育士類爲急務嗟乎可謂知本矣有司簿書鞅掌而于師生之考課人材之栽培往往不暇講求而誘掖之則在賢大尹振興鼓舞作其氣而導其機所謂革其舊而新之也班史序循吏則曰廉平寬和其璽書所褒亦以利愛及民爲最古之善利民者盡其地必籌其時穰也節之而防其淫饑也萃之而慮其散今天子神聖慈惠念民依而厘民艱倉廩廣儲恩施汪濊凡所以爲民生計者周且悉矣而邊遠災歉潤

枯澤芟尤賴良吏權宜斟酌而弭其患庚子夔州饑有剝樹皮草茹而食者鹿儕爲請築夔城以工代賑鳩工數閱月存活無算時奉節巫山大寧並饑過蠲俸千餘金屬邑人士之篤實者綜覈平糶以濟就食之民是歲夔饑而民不殍昔范希文鎮浙西趙清獻知越州皆以修城役民救荒行惠鹿儕其猶古之道與夫不忍浚民之生其生所以延也不敢隕民之命其命所以永也蘊慈祥愷悌之心以養其淳粹廉靜之氣所謂仁者壽非耶今年仲冬二十二日爲鹿儕六十誕辰同官謀稱觴屬余侑之以文時余自宛南省方歸過嗟我山下適河決中牟有勸捐助工之令鹿儕推心寘腹開誠布公不旬日而輸金錢二十萬有奇

南海虞維則堂家譜

卷二

藝文

三

僻壤窮氓咸以太守有命以不得入錢爲恥嘻其平昔之得民亦可概見矣我觀史漢所載循吏多稱二千石何也蓋太守爲吏民之本得其人則政平訟理而其人類皆享遐齡躋壽考得非溫醇敦篤之心有以感吉祥和霽之氣與鹿儕簡篤淵邃其典大郡也如京朝官其爲京朝官也如山澤之癯章布之士其于物也澹矣是以氣固而神完惠澤之溥勛業之崇于是乎在他日以循良結

特達之知屏藩開府播駿聲而錫純嘏又豈有涯涘也哉道光二十有四年歲在閏逢執徐仲冬

穀旦

欽加鹽運使司鹽運使銜分巡河南南汝汝光等處兼管水

利驛傳道加十級愚弟李凌雲頓首拜撰并書

虞階翁崑圃翁兄弟同壽序

世有鍊形五岳之圖棲志十洲之記銀膏滴瀝鴛漿延菊  
井之齡玉闕岩堯鳥篆注桂陽之籍非不綿綿甲子浩浩  
春秋然而霞舉一窠人之競爽朱昂二老歲匪同生未聞  
連理枝交比靈椿而布算貞珉字永譜常棣以鐫碑若我  
虞階先生暨崑圃先生兩君者尤可羨焉兩君五忠華胄  
百粵高門以同祖昆作齊年友材論地望有龍文驥子之  
稱樂序天倫無雌甲雄辰之別山何分乎大小屋奚隔以  
西東以視酥酪醍醐但名當世封胡羯末不並大年簡冊  
伍張方之蔑矣夫因心者篤慶之原美意者延年之具兩  
君元和至性秉自觴辰淳備有聲聞於珂里家守張公之  
南海慶維則堂家譜

卷二

藝文

三七

法字作百餘世敦崔氏之風衣同一片裴刺史鼓聲八院  
甥姪亦有稱名劉良臣食具一庖子弟皆知禮節所謂敬  
若賓客罔閒晨昏保若嬰兒同躋壽考者何怡怡如也猗  
歟休哉加以至心爲內飲人以和流潤乎千里而遙氣得  
乎四時之備對李士謙了債惠實逮其子孫畏王彥方知  
名化久行諸鄉里此又兩君之德若耳鳴善難毛舉者矣  
且夫大塊多勞莫繫秋蓬之跡人生少聚輒馳春草之神  
思聽雨以何年每看雲而度日參商不見夢寐何方而兩  
君抱甕息機同盤對食自幼及老如影隨形竹敵千戶之  
封田買十雙亦足守中人產肥瘠何分乘下澤車臥起一  
處王微以圖籍相慰互課佳兒楊椿之幃幔就休笑談美

味此兩君所以弭節和神之國寄通挹景之區肄樂志之一篇提養生之四印也况夫鴻案相莊鹿車各挽入門有慶築里無猜作脯何嫌豈待讀書之不輟叩頭惟謹非因閉戶之自搗噓祥氣以滿堂吐吉雲而在室宜乎集祐門庭發祥家術叢生福草蘭桂蔚爲後昆駕並壽車金玉居然老友二難以并百歲爲期無量之徵此其明著歟文俊等近接仙鄉翹瞻仁里挹二崔之風範熟兩到之聲名當此鶴筭添籌兕觥介酒狼弧並耀鳩杖齊高白首同居洵天朝之盛事黃兒應卜直地行之神僊用是瓦奏畧陳匏宣藉獻竚見光增綽楔

金章來北至之鸞遙聽韻叶壘篴銅笛寄南飛之鶴是爲

南海廖維則堂家譜

卷二

藝文

三

序

道光二十六年歲次丙午孟冬上澣穀旦

賜進士及第

誥授資政大夫工部左侍郎前翰林院編修記名御史左

春坊左庶子 日講起居注官侍讀學士侍講學士

通政使司副使詹事府詹事內閣學士兼禮部侍郎

銜署工部右侍郎兼管錢法堂事務山西陝甘學政

加三級紀錄四次愚弟羅文俊頓首拜撰

賜進士出身

誥授中議大夫太僕寺卿安徽學政前翰林院編修翰林

院侍講侍讀學士通政使司副使 日講起居注官

庚子 恩科四川鄉試副考官甲辰 恩科山東正  
考官加三級愚弟羅惇衍頓首拜書

秋藻翁六十壽序

壽人之所同欲也然常人之欲壽不過康強健食長享遐年已耳君子之欲壽非第爲引年計也有性命之全功闋世深而學養始粹有教化之實行歷年久而淪浹始周故君子之欲壽與衆人同而君子之所以欲壽與衆人異君子之所壽與衆人異則壽君子之壽亦與壽衆人之壽異若秋藻叔父夫子大人得天之厚集祐之深行將杖履優游期頤永慶誰謂不宜而吾之所以壽之者初不止此夫壽之不可必得者天也而壽之有可以共信者理也古之稱壽者曰大德曰仁人蓋惟德故壽惟仁故壽今我夫子命志既遠立品維高以涵養道義全其天以躬行教化踐

南海廖維則堂家譜

卷二

藝文

三

其實族之所賴咸仰仁人鄉之所欽率稱盛德於以知夫子之得天多而事天之功獨至集福厚而種福之根彌深誠哉古之所謂理所共信天每因之而君子之壽果異於常人之壽則今日之所以壽之者亦應有異也然夫子潛養深而常若不及積累久而愈若欲如大德如愚虛懷若谷蓋自束身庠序紀籍賢書數十年如一日焉書有明言惟謙受益夫子謙衷若此則夫承天庥而迓多福也詎有既哉他日者齒高德盛爲鄉國儀型安車蒲輪爲

熙朝盛事則今日周甲之慶特其始事焉耳松侍夫子之日最多窺夫子之深頗悉於稱觴之下而愈深欣祝也因敬爲之序

道光歲在著雍涪灘寅月朔越三日

例授文林郎揀選縣知縣己亥科舉人受業愚姪松頓首  
拜撰

例授修職郎候選教諭丙午科副貢生從姪衡平頓首拜  
書



馬孺人九十壽序

易曰坤厚載物德合無疆蓋惟厚故博人能有博厚之德則無疆之福萃之然九疇五福求之士大夫尙難况其在巾幗乎惟我廖老親母馬太君望出扶風幼嫻母訓淑慎其儀迨于歸南輝老親翁必敬必戒鴻案相莊視昔之邢孟不愧焉南輝老親翁負經濟才少歷艱辛銳然圖自創業于是貿遷四方匪勉勤儉又得太君爲之內助而家道已成老親翁年近古稀始謝塵世而太君義方之督慈以代嚴顧慮家計小康諸子幸俱成立恐墜失前緒無以貽謀則諄諄勉諭諸郎以成先人之志而行事尤識大義持大體歲有偶歉卽發粟黨里恒交誦之今歲復命諸子建

南海廖維則家譜

卷二

藝文

三

築祠宇用妥先靈蓋其行事誠與孳孳求田舍者有異至若居身以約待衆以和御下以寬其懿範德音猶有不能殫述者斯誠巾幗中所少概見是非具博厚之德何能若此故宜集福無疆而壽考惟祺正未有艾也茲仲春和煦爲太君設悅之辰親友製錦稱觴徵余言以介壽余觀太君齒逾九旬精神猶康健而嗣君應亮親家六十有一鄉邦祭酒羣欽望焉若仲與季應蕃應昭親家俱克成立三鳳題名榮膺寵秩九如交頌慶迂春祺環顧一堂母子頻邀壽算欣看四代孫曾大振家聲信乎積德之家必有餘慶也他日奉板輿膺

紫誥令人仰寶婺之輝而歌昇平人瑞者於是乎在不可

以操券獲之哉故樂紀其概而爲之序

乾隆四十二年歲在丁酉孟春上元穀旦

賜進士出身

誥授奉政大夫禮部祠祭司郎中兼儀制司郎中前 欽

命提督貴州全省學政壬申 恩科順天鄉試同考

官庚午科福建主考官癸酉科四川主考官充 大

清會典館纂修吏部文選司員外郎稽查正黃旗教

習驗封司主事稽勲司主事翰林院庶吉士年家眷

弟馮成修頓首拜撰

賜進士出身

誥授奉直大夫直隸晉州知州前任江南江寧府江浦縣

南海廖維則家譜

卷二

藝文

三

事蘇州府震澤縣事庚寅辛卯兩科江南鄉試同考

官加三級紀錄五次年家眷弟梁昌聖頓首拜書

譚孺人八十壽序

聖天子御宇六十載斂福錫極覃敷廣被海內涵濡久道之化相安於飲和食德雖在婦人罔不同躋壽域猗歟盛哉願余謂非壽之難壽而可傳者爲難易曰坤厚載物德合無疆又曰地道無成而代有終則知女子之以壽稱者不徒有年之足尙而能相其夫成其子有合於坤德之爲貴也邇昔門庭熾盛必滋內助顯親揚名胥稟母訓史載三遷勸學勞逸作箴午夜和丸中堂畫荻以長以教母而兼父所從來遠矣良寶廖明軒翁元配譚太孺人以今歲甲寅九袞開一諸戚友製錦稱祝徵言于余余自諫垣予告里居卽知廖氏爲著姓旣應聘爲粵秀山長而太孺人南海廖維則堂家譜

卷一

藝文

三

長次兩君皆旅寓羊城時相過從益稔太孺人懿行之詳太孺人爲邑名儒唐憲先生季女幼稟庭訓動止必循禮法歸相太翁鴻案相莊敬戒無遺太翁經商漢鎮時或經歲不歸太孺人祇奉厥姑孝養備至持家政以勤儉待妯娌以肫誠庭幃雍睦內外無間言旣中道孀居督二子以服賈繼志以故數十年間家日益隆業日益創興建祠宇以妥先靈高大門閭誕受多福長君以臬佐蒙推恩之典太孺人奉

勅特錫崇封次君亦以展策功曹需次試用諸孫或肄業成均或隸名仕籍堂有聖善之親膝繞孺慕之子金花降白彤墀玉樹週遮庭砌可不謂極人世境遇之榮哉富

貴不足怪余於太孺人別自有感也今夫家擁厚貲惟知封殖自奉卽義所當爲錙銖亦所必較者丈夫且然何論巾幗今觀太孺人兩遭歉歲勉子以賑濟而不懈始終贊築衢路督子以董役而不辭勞悴遠近咸爲稱頌而太孺人且曰吾知承先志耳詎爲名哉然後知含宏光大積有餘慶太孺人之壽其有合於坤德難能而可貴者矣兩君將卜以初春爲介眉之會余特紀其實以備彤史且以徵太孺人幸際昇平醞釀深厚食報於子孫者正未有艾而是日也霞珮斑衣互映萱堂柏葉椒花同陳春酒太孺人顧而樂之其亦滿引一觴已乎是爲序

乾隆歲在甲寅臘月上浣穀旦

南海廖維則家譜

卷一

藝文

三

誥授中憲大夫

賜進士出身戶部掌印給事中前掌陝西道監察御史巡視西城察院禮部精膳司郎中刑部陝西司員外郎湖廣司主事充乙未科武會試同考官戊戌科文會試提調官翰林院庶吉士加二級年家眷弟陳其焜頓首拜撰

特授國子監學正鄉進士截選知縣年家眷弟勞潼頓首拜書

譚孺人九表開一壽序

自古家門之興不特其男子卓犖有高世之志閭壺內必有主持家政精神綜覈而後能相與以有成至若良人志業未完委捐中道仰事俯育以一身承鞭策後人卒能光大前業正所謂無成而代有終其才德與陶鄭歐賈諸母爭光矣太孺人者良寶廖族明軒翁伯父之元配也父爲名儒身嫻禮教入門與翁相敬如賓上事親姑旁接妯娌翁如也翁初客漢鎮後居羊城或經年一歸家事惟太孺人是賴孺人檢校周密矩立規呈門無嘻嗃兩遭歉歲輒以夫命捐賑鄉老先生咸歎息謂其不愧丈夫也家勢方隆而翁捐館太孺人事始益謹飭二子繼志述事脂膏果

南海廖維則家譜

卷二

藝文

三

餌奉祖母者必過于己身凡生事葬祭必誠必信殆不啻翁之猶在也二子克體慈訓和氣致祥天恩賁自 彤庭白屋登爲仕籍太孺人老而彌健家慶亦衍而彌長今者

鳳詒馳封軒裳之貴太孺人親享其榮里黨皆歎其食報之隆而不知其致之有本也太孺人之事姑也以婦道兼子道其訓子也以母道兼父道此膺受多福所由來也聞者可以興起矣今歲臈月值太孺人九表開一佳辰膝繞曾元階叢蘭桂戚友製錦稱觴侍御陳公序焉族人共爲加爵欲余一言余與聲兄弟最善文酒過從誼託一家故不以不文辭述此以隨諸老之後時乾隆歲在甲寅季冬

穀旦

例授文林郎揀選縣知縣己亥 恩科鄉進士姪重熙頓

首拜撰

南海廖維則堂家譜

卷二

藝文

三

鄧黎兩太恭人亡表晉一同壽序

夫以冰霜自厲桓文凝之經禮并嫺紡績相資陶士行之功名特顯懷清臺築慶老堂開尊榮已邁於等倫矜式早隆於州里又况慈竹交枝益茂凌寒之節貞松連理長留閱歲之柯鏡鸞孤而共舞釵鳳隻而齊飛對爾等其何憂作子師而並可相依爲命寧問所生若子若母其安知同居同行而自吉陸雲車之禮度上庸並勗以義方張師亮之遭逢晉國遂膺其老福若我同年友鹿儕廖君生母鄧太恭人庶母黎太恭人殆彤史所刻聞而女宗其罕儷者矣方兩太恭人之歸我年伯潔泉公也賢如絡秀願適安東慧比清娛樂隨司馬我年伯母梁太恭人萱茂芳齡蘭南海粵維則堂家譜

卷二

藝文

三

需吉夢兩太恭人共承箕帚獨抱衾裯一則社燕先巢一則石麟雙誕使謂序循魚貫每恐相凌况云端毓龍文易生遙如荔樹頻栽原是側生之果桃枝未斫難名交讓之花已而扇如比翼絹類雙絲男錢女布同襄出入之宜韭菘梅蘇交稱調劑之得設雙弧而遞慶桃對祿以相將敢令弄藥爭花早驗提戈取印旣而藁砧永去漆室同悲種乏丹陽之柑餉絕會稽之米晨炊共竈甑屢生塵夜紡同燈絲虛佇月顧我復我嗟黃口之何知恩斯勤斯幸白頭之相伴同塵共迹落落誰如隻影單形亭亭欲偶比肩難卸凶年而曷採菱萼四目相看破曉而尙勤菡繡長君逸山風宇條暢文采葩流宏微龔建昌之封叔高綿光祿之禩

次君鹿儕同年對嫺初月乘愛長風下金鏡而獨悲衣葛  
衫而敢戲誰令驅雀乃作賦而始歸偶聽叱牛更投書而  
欲泣兩太恭人誘教不倦撫字並隆畫荻心同折蓂念苦  
誰蒙錦被致來郭泰之譏親授異書獨厪范滂之傳束之  
以讓令器或冀其早成勸之以脩勤先業方期其勿替  
韓康伯之寒甚方爲作襦翟方進之幼年相隨織履異聞  
欲廣已無金筥之可傾餘慶尙留卽獲錢船而亦掩我鹿  
儕同年一鬢之雋絕世之才瓏璫其聲崢嶸已甚佇泥金  
而送喜旋淡墨以書名得上金梯卽歸蘭署曹則劇而選  
高位非卑而名著賢如柳或判請戟而敢行貧似鄭權居  
傲屋而仍貴卜行能於緒業飾政事以文章何遜才子舊

許能詩崔沔閑官宜甲侍養兩太恭人久安南食不賦東  
征孟仁之鮮何來田稷之金敢付郵筒遠遞屢責平反邸  
報遙來密詢消息倚閭不事如支魯郡之胡床待滿才歸  
肅拜甘泉之圖畫鹿儕擬掛冠而未許思捧檄之有人爰  
命妻子以先歸特俾晨昏之恪奉而兩太恭人方且無忘  
恭儉益厪勞謙比德儷心停辛佇苦 貴賜金章紫綬而  
竟無華飾之須 榮膺丹轂文軒而共樂板橋之御花姑  
竹母撫機或勸其且停竈婢齋娘煮粥反令其先啜虔惟  
奉盥曷聽文楸之聲樂遂含貽久絕樗蒲之戲宜其慈雲  
永駐寶月長圓期屆明春頌禱恰當平仲月壽踰七秩後  
先從晉乎八旬鹿儕將假以特還乃徵文而豫祝身羈日



下願空切乎躋堂誼託年家儀欲修五拜母爰綜其霜辛  
露酸之况特徵其松茂柏悅之符不同朱鳥斑麟彫霞鏤  
月佇見北堂草綠東閣花香導太常之輿持汝南之節門  
駢珠履庭燦玳筵兩心相印誰忘倚竹之寒八座非難定  
副牽蘿之願分光耀於文昌惟參惟昂萃英靈於江漢有  
汎有沱赴蟠桃之宴原宜杞婦湘妃吹華黍之笙閒普離  
鸞別鶴偏是百花生日精神翰並蒂之蘭休論寸草春暉  
建豎卽長生之藥

道光八年 月 日穀旦

賜進士及第翰林院修撰加一級年愚姪林召棠頓首拜  
撰

南海廖維則堂家譜

卷二

藝文

四

賜進士及第翰林院編修加一級年愚姪羅文俊頓首拜  
書

黎鄧二太恭人壽序

翱與鹿儕居同里生同歲長同學其生平艱苦困乏窮達出處之故亦畧相似翱少失恃常從鹿儕定省兩太恭人事之如母兩太恭人亦體恤而顧復之凡門內事所以代爲謀處調護者無不至故雖疎屬而休戚關切不啻親子姪焉兩太恭人皆朝議大夫潔泉公側室朝議公五十猶未舉子最後納鄧太恭人乃一歲而生鹿儕及其兄逸山時嫡母梁太恭人已老朝議公貧甚不能備乳媪黎太恭人分撫二子如己出甫四歲而朝議公見背家徒壁立勤苦備至卒撫二子以至有成承先人命以逸出嗣伯父靜波公稍長使習爲貿易而命鹿儕受學謂之曰汝父爲諸生數十年艱于一第汝能攻苦力學無墜先業吾可以對汝先人無憾矣家計日蹙則令課徒自給而躬自紡績佐活不使以貧故徙業也嘉慶丙子鹿儕舉於鄉明年成進士官工部主事二母皆以

覃恩馳封太恭人鹿儕家旣貧不能不爲祿仕兩太恭人

以路遠年高不樂就養京邸鹿儕日夜思慕常欲棄官歸養太恭人屢以書止之前年丙戌翱成進士官山西知縣乞假省墓乃屬翱挈其妻子南歸侍養旣抵家兩太恭人喜甚婦亦賢孝能得老人歡日弄諸孫無殊鹿儕之在側也方翱與鹿儕家居憔悴時困躓無聊歲復一歲相對愁歎常恐菽水不繼爲堂上憂豈意其復有今日而翱母先

太孺人已不及見瞻顧庭闈徒抱終天之憾而太恭人以  
垂暮之年得見鹿儕成立疊膺錫命子婦承歡諸孫林立  
俯仰今昔常有喜極而悲悲而復繼以喜感慨歛歛歡欣  
慰藉而不能自己者也今歲鄧太恭人八袞開一黎太恭  
人八袞晉六鹿儕將遍告僚友舉觴稱祝以爲宜序太恭  
人者莫如翺回憶去年翺赴任北行登堂告別兩太恭人  
猶惓惓若不忍捨相去萬里恨不能躬拜堂下跪進一觴  
然兩恭人雖春秋高而起居安適氣體日益康健天佑節  
孝獲福尙未有艾翺方與鹿儕約數年後祿入稍存餘積  
便當買田退耕爲聽雨聯床之樂此時板輿侍奉戲綵承  
歡正自有日翺朝夕過從杯羹侍側猶能追述平生悲愉

欣戚之故博老人色笑也

道光八年歲在戊子八月穀旦

賜進士出身分發山西卽用知縣己卯科解元愚姪翺頓

首拜撰

黎鄧二太恭人壽序

粵以松柏挺秀歲寒後彫蘭蕙揚芬國香斯在故貫四時  
而不改則霜雪弗渝處空谷而不言則風徽自遠固宜貞  
壽是啓祥徵以鄧太恭人之安貞黎太恭人之甘節信同  
福之斯受爲衍慶所由來相與有成含章時發自天之祐  
致福之原也溯自江汜于歸螽斯和集風人所美福履爰  
綏佐君子以宜家惟光以大承夫人而樂德能敬且和則  
黎太君協同人之亨鄧太君應歸妹之吉星在天而夙夜  
月幾望而不盈季蘭奉筐篚以從維鵲洽睢麟之化釐爾  
女士卜以宜男如蘭則二人同心有子則三人緩帶演連  
珠于合浦分潤瓊源種雙璧于藍田含輝崑閩爲家之慶

不吝則醕酒有奠乾餼無愆睦婣之道窶貧弗怨焉以故  
交讓爲瑞常華相輝鮮侔晨葩粲乎朱萼循陔志潔眷戀  
庭闈肯構充閭敬恭桑梓以積善之餘慶宜觀光而用賓  
長君踐矩循規晨昏侍養次君發名成業懷器乘時遂以  
連捷南宮分光列宿往日錦衣歸里戲斑綵以承顏紫佩  
躋庭協壘篋之雅奏顯族有伯仁之母錫類猶考叔之風  
聯親串以臚歡集鸞凰而滿室兩太君顧而樂之若固有  
之僉謂是德是福弗祿爾康而不知斯恩斯勤獲報不爽  
豈惟母以子貴是宜福自來崇耳方今祝十真於靈飛沐  
九重之潛露

龍光疊錫燕喜重歌同膺翟弗之榮並著珩璜之度

南海履維則室家譜

卷二

藝文

四四

丹綸鳳集倩青鳥以傳言

紫誥鸞迴藉慈烏而送喜蓋兩太君之處安節者旣歷四  
紀而祝眉壽者爰始七華安輿厯樵水東西弄諸孫而繞  
膝錦幄照科峯上下環三鳥以添籌凡茲譜屬通家班聯  
玉樹每依北斗紀瑞芝雲凝望南躔延輝寶婺酌彼康爵  
盍我朋簪酒釀維馨德音是茂用陳辭於介雅衍繁祉於  
洪疇

道光八年歲次戊子八月穀旦

賜進士出身

誥授朝議大夫戶部江南司主事加四級紀錄一次年愚

姪譚敬昭頓首拜撰

賜進士及第

誥授中憲大夫翰林院修撰 國史館協修己卯科廣東

鄉試正考官加七級年愚姪吳其濬頓首拜書

南海廖維則堂家譜

卷二

藝文

四五

鄧太恭人八旬壽序

嘗讀周雅之文曰孝子不匱永錫爾類錫類之義儒者弗克深究道光十八年冬十有一月

皇帝簡工部郎中南海廖君知四川夔州府君與仁和龔鞏祚最友善語鞏祚曰吾有老母今年八十矣南海距京師遠吾母不樂北方不就養今之承

恩命而西也將謀取道楚之常德間關水驛以迎母又曰吾自歲己丑省侍離邰下十稔家書至益健宜賀我夫夔州今西南之上腴也祿入甚厚君此行同朝士大夫莫不羨之尤羨其克逮祿養爲福之竺爲時之祥爲士夫之榮爲大順之至廖君則又條筮其母平生而告鞏祚曰吾母

南海廖維則家譜

卷二

藝文

巽

鄧太恭人先君子之簞室也先君子五十無嗣太恭人來歸一歲中再誕我兄弟故我名曰甡甡生四歲而先君子沒矣吾母仰餽粥於伯母以撫二孤以吾兄爲伯父後先君子遺書一敗簾督甡讀之一燈熒然書聲琅然紡聲謾然鄰里已識廖氏爲有子吾已議婚婦家訶知廖氏貧議悔婚里父老不平將訟之太恭人曰彼弗能安貧強之歸我能相安乎吾兒勤學重以先世積德吾門且昌何患無婦乃再聘於馮氏今馮恭人也恭人侍姑南中姑以爲孝吾十年無南顧憂吾忝科第累蒙

主上恩今官專城門戶果大皆如吾母之言鞏祚聞之感且泣同朝士大夫知太恭人晚歲如此其獲天祐助祿如

是厚躬如是康彊人倫如是其順而不知其生平况瘁如此古人云庸德之艱難百倍於奇節異烈亶其然哉廖君篤於朋友語輦祚君集一百卷未琴行我將任其半又君有歸養之志以負責京師不克如志明年我當以俸寄君飲君裝輦祚有老父離鄰下之歲一如吾廖君離其母之歲陟岵永歎以責言不可去疚孰甚焉今君及此言是君以鐘鼎養輦祚得以林泉養也是君之有功於斯文甚鉅有功於我平生出處本末又甚鉅也憬然曰既醉之詩曰孝子不匱永錫爾類異日兩家郵筒相問訊於五千里之外宜臨風而誦是詩廖君曰善盍書之遂書之下以誌友朋聚散之感中以祝廖君政成上以爲鄧太恭人壽

南海廖維則家譜

卷二

藝文

三

道光十九年 月 穀旦

賜同進士出身前禮部主客司主事宗人府主事仁和通

家子龔輦祚頓首拜撰

賜進士出身翰林院編修世愚姪何紹基頓首拜書



周孺人譚孺人同壽序

自古孝友睦婣之行著於一家而孚於閭里者非獨其人  
之賢閭門之內將順而從之者亦與有力焉然地道無成  
往往不見稱述惟獲報之符則確然其不爽伯母周太孺  
人爲伯父恬然公淑配譚太孺人爲二伯父介然公淑配  
皆以柔順和婉佐兩公成家創業積德行善自少至老家  
庭內外之際無間言夫吝嗇之難化也計較審而孝衰於  
親畛域分而友衰于兄弟財利自私而刻薄且行于親戚  
鄉黨此其弊在婦人尤甚而浸潤所入雖號稱賢者鮮有  
不幾微爲其所惑兩公少孤常行商于外而事母譚孺人  
以孝稱白首怡怡析產讓財無所區別又以其餘卹貧賑

南海廖維則堂家譜

卷二

藝文

哭

乏一鄉一族中舉行善事兩公無不爲稱首其孝弟慈祥  
輕財樂善至今人猶稱道弗衰人徒知兩公之盛德而不  
知順承濟美兩太孺人實能相與以有成也特以安常處  
順若無表異遂以爲母德之固然而不覺耳易曰无攸遂  
在中饋貞吉又曰富家大吉夫子釋之一則曰順以巽再  
則曰順在位婦人之德莫大于順順斯吉矣今兩太孺人  
諸子皆能繼前人之德譚太孺人艱於產育撫諸庶子如  
己出而次子早已蜚聲譽序間諸孫如玉茁蘭芳碧梧翠  
竹所謂有是德宜其有是福理所固然無足異也今歲周  
太孺人八袞開二譚太孺人八袞開六周太孺人祿嗣簡  
居兄又適週花甲子孫捧觴上壽族人咸往製屏稱祝屬

序于翱翔自少受兩公覆翼與其諸子相愛不啻骨肉似  
知兩孺人之詳者宜莫如翱夫富壽康寧兩公已備享之  
而兩太孺人康強逢吉乃更延愛日而彌長此即可爲簡  
居兄慶并爲諸兄弟姪慶者也是爲序道光元年歲在辛  
巳正月初十日

敕授文林郎揀選縣知縣己卯科解元愚姪翱頓首拜撰

迪康先生傳

曾姪孫 姓撰

迪康先生者南海西樵之老儒也和平長厚無疾言忤色能以德化其鄉人鄉中爭訟得先生一言無不立解家酷貧且耕且讀一日至田所決水灌田有鄰村子爭先灌反擠先生落水中族人見者奔往將拯鄰村子先生曰非也吾自失足正賴彼引援耳後鄰村子知爲先生乃至先生家泥首謝過無數又族人偶與鄰村構釁數十人排械相毆勢莫能解先生適自他所歸族人望見爭匿避恐爲先生知鄰村人亦曰先生也皆解散去其屈服人類如此先生貌不逾中人而氣象充然對之者如飲醇醪不覺輒醉卒後數十年至今言長者猶必曰迪康先生幼嘗應童子南海羅則蒙家譜

卷二

藝文

五

試不售遂不復進取其持身涉世一以謙和卑牧爲主或曰先生權剛爲柔含容堅忍是殆深於老氏守雌之旨者惜乎不用於世知之者少而僅以一鄉見也生平與人未嘗雌黃可否雖負販牧豎無不以禮接之臨終遺戒無他言但曰願吾子孫勿厭貧苦雖教讀童蒙毋忘家風清白也先生姓廖氏諱 字迪康卒于乾隆 年壽八十有子六人文璧邑諸生以剛正方嚴爲鄉族所憚然卒以此與世多齟齬曾孫數十人翺現爲邑廩生

誥贈中憲大夫鶴林公傳

姪 翺撰

鶴林公諱如蓮字蒼華號潔泉 凝真祖之十七世孫也  
祖樵叟父盛菴世有令德公性孝友喜任俠好讀書不樂  
習帖括事乾隆中 朝廷事武功公大有請纓之志日習  
武事舞刀誤傷額爲二伯兄靜波公戒責乃下帷折節讀  
書習詩經吳殿撰鴻視學嶺南閱其文器之取進邑庠屢  
舉不第遂絕意進取隱居里下課徒自給養花釣魚怡然  
也性嗜酒嘗讀書於西樵山之翠巖醉後獨登大科紫雲  
諸峯朗吟嘯歌以舒其磊落抑塞之氣尤工書擘窠大字  
更絕倫然不肯多寫醉後書法更有神今所存者仁軒祠  
南輝祠世昌堂各扁額皆其親筆後人不能及也年五十  
八卒臨終誡其家人曰吾累世皆忠厚無失德事後嗣當  
有昌吾家者不必以貧爲念今二子皆在襁褓他日當教  
以讀書發名成業以繼我生平未竟之志勿使頽惰自安  
致慚祖訓也所作詩文歿時子幼散佚無存後以子姓貴  
誥贈中憲大夫墓在西樵山紫雲峯之麓

擊儔翁傳

姪翹

西樵龍津間有長者曰擊儔翁自搢紳先生以至田夫野老識與不識無不曰擊儔翁長者也翁爲迪康先生族人諱金聲字擊儔天資醇厚渾涵不露雖甚喜怒人鮮得而窺之家素封儉而好施財利出入未嘗較纖悉遇歲饑輒倡率賑濟前後存活甚衆平時戚友以事稱貸無吝色或代酌其所費而多予之不責券雖家人婢僕不使知久卽翁亦不復記憶鄉中凡利濟事翁無不倡首族有始祖祠將圯翁首捐數千金與族衆擴新之工成費金萬餘而嘗產無缺以此族人尤德翁與人慈祥樂易而性尤愛士族中聰俊子弟貧不能給者常歲資其脩脯以助之有爲知

南海廖維則堂家譜

卷二

藝文

五

名士者所行善事無幾微近名習然不善逆億心之所安卽行之以故作事常踈拙人或緣以欺罔心計者往往以此笑翁愚然忠厚悱惻之意事後常令人思不置雖讀書精義者未嘗不歎服以爲難及所謂不踐迹亦不入於室者蓋其性然也昔魏叔子作善德紀聞序曰衆人者天之子天以此子爲賢而特豐之以卹衆子之貧而今之擁厚貲者卒以計錙銖厚封殖爲守富之術果爾則不善守富者莫如翁而翁富固無恙世之守富者竟何如也至若學士大夫誦詩書講道義爭以文章氣誼相尙及當親友緩急坐擁厚糈不肯分絲毫相助或因纖悉財利徵色發聲甚而凶終隙末者比比然也嗟夫使世有好名之人能以

好施而市其德其行事吾猶謂加人一等况乎施德而又不好名者哉嗚呼若翁者其真可以富矣翁與弟拳儔翁相友愛至老然後析產所行善事拳儔翁皆能順承之以成翁志翁卒於嘉慶十八年壽七十有六有子二人孫五人曾孫三人

翹曰先大父玉堂公卒翹始六歲已不及見曾大父迪康公及長從鄉先生遊猶數數聞稱道弗衰若拳儔翁則族伯父翹親受其卵翼者也夫鄉族中得一賢智之士不若得一善人若迪康公之貧而能懋其德公之富而不倦於施使常得一二人者置於鄉里間以爲矜式則風俗安有不醇人心安有不厚者哉或曰迪康公積善後必有興者南海廖維則堂家譜

卷二

藝文

三

而拳儔翁于翹亦屬望彌殷碌碌無成祖德就湮感恩莫報每念及未嘗不感泣累獻也

書佩堂公事

姪孫松

余髫齡時卽聞人盛稱族叔祖佩堂公之德迄今垂二十餘年而談者猶津津樂道之不衰因思公之生平非實有德義入人之深斷未有沒世云遙尙不沒於人心如此者惜余少時雖逮見公而童子何知不能窺公之爲人也歲辛丑適自都門同人談次偶及公始得見先羽臯叔向爲公序頗詳而後有以盡知公之實行益嘆人之稱道者信非溢詞而又懼日久傳聞之失實也遂爲之重述其梗概曰公諱士珩字翰潮乃宋始祖凝真公十七世孫十六世應昭公之嗣也性孝友慈惠幼失怙恃事繼母馮庶母麥皆如己自出勞養備至始終無間焉時公母陳外家中替

南海廖維則家譜

卷二

藝文

書

故居悉質於人老弱無棲止公聞之慨然爲營金贖宅又月給薪水費養生送死身任二十餘年幼者卒得成立其善體親心於沒後猶如此向使公得逮事前人則所謂養體養志者又當何如乎方公少孤家業悉管於兩世父旣長兩世父將三析之公曰吾產安敢比伯父且吾家食指尙少無用多爲請五分之而取其一兩世父執不可則意益堅兩世父鑒其誠強從之無何兩世父棄世諸伯兄相繼歿諸姪家中落公撫之皆得所復時以所有分贍里黨貧乏而於寒士尤致意焉以故數十年來業不加增也而公怡然自得卒儉約以終其身夫末俗之衰也趨鋤德色薄於父子分門別戶薄於兄弟往往臨小利害僅如毫髮

骨肉之愛輒以反背甚至險則陰以相擠暴則顯以相鬪  
卽間有一二倫誼稍知者不至較及錙銖已難概見而究  
之便身圖私妻子之念未易忘也以觀公之至性至情人  
之度量相去豈不遠哉若公者誠可以風矣公素善調攝  
且計事精明深謀遠慮內外方倚以爲重而公遽以病終  
臨終時呼二子侍側檢平日他人所質田宅券凡數十紙  
悉召其人至榻前還之曰吾無爲後人累也各皆感泣而  
去公產不過中人而所還券數千金此尤人情所難且彌  
留之際顧命不遑誰暇及此因知公之神定不亂益足徵  
所養之有素也終之日內外戚黨哀痛扳號至有欲以身  
代而不惜者嗚呼可不謂仁與後之人讀行畧之所述聽  
故老之所傳其庶足以知公矣



山西定襄縣知縣羽皋公傳

弟 姓撰

公諱翺字鵬卿羽皋其號也會祖迪康公以德望重於鄉黨祖玉堂公爲邑諸生有聲庠序公生而聰穎過人讀書數行並下貧不能自給族伯恬然公喜子姪讀書每歲給薪水教之讀弱冠補博士弟子員公好讀經史古文不喜習時藝所作制義力追前明 國初諸大家而不投時好故累躓場屋家貧與姓皆授徒鄉里旦夕過從互相砥礪每有所作我獨賞公之豪邁公亦喜我之清雋時公失恃我亦早失怙均在惇獨孤苦中交相親愛如手足也顧雖貧甚而廉隅自礪絕不肯爲一切苟且之事相約讀有用之書爲他日建白之地不喜事家人生產除夕無聊偕登

南海樓雜則彙譜

卷二

藝文

五

樵山絕頂峯豪吟長嘯有舉頭天外之槩一時狂名動於閩里嘗受業於崔蔭亭蕭南池兩先生門每閱其文輒以第一人相許可時我先公成進士至己卯歲公舉孝廉第 一人主試者吳瀚齋郭蘭石兩先生也丙戌捷禮闈出爲山西定襄令性慈和多惠政民戴之如父母定襄民好健訟公判案忠信明決民悅服之訟獄頓息大吏知其能文三調校鄉闈所得皆一時名士榜首衛君佐堯實出其門議者謂爲衣鉢相傳云公每科分校必有程作讀者咸謂足魁多士場中皆拜下風足以見公之學力老而彌深矣定襄旣理當道器其才欲調劇邑膺卓薦因新歲晉省謁大父遂以疾卒於太原時年五十有二以公之才學經濟

而不獲大用於世爲可惜也返旄定襄百姓哭奠於道行  
弔之日邑人送萬民傘白衣冠而祭者人多不得進署在  
門外哭拜而去宦橐蕭然藉民之賻助始得歸其櫬至於  
今定襄民尙思慕之不忘嗚呼足以見公之實心實政恩  
德入人之深也所作詩文稿不自收拾多散失僅錄其偶  
存者若干篇治定襄多暇日仍手不釋卷著有四書釋尙  
書釋詩釋三種皆出自心得之學梓行於世墓在西樵白  
山口

迴瞻公像讚

并序

十八世孫 蘭田

詩曰孝子不匱永錫爾類又曰毋念爾祖聿修厥德則知孝自能錫類而念祖又在修德也我迴瞻祖孝友慈愛創業維勤樂善不倦捐貲而建小宗祠置產以厚嘗業年登大耋聲譽著聞邑侯郭公賜皓山借一扁額當世榮之迄今仰觀音容春風和藹猶可想見其生平貽謀燕翼所謂錫類者非耶惟我後人當勉修厥德可矣爰為詞曰

德積于闇行靡不臧貽之以道守之有方勤則不匱儉乃可常子子孫孫勉修厥良

直隱公像讚

梁大選

南海廖維則家譜

卷二

藝文

五

淵穆之神瀟灑之態德以為衣玉以為佩雖鵬翅之未展於其中曾不介是以仰瞻鶴之髮松之姿莫不神怡而心醉

楊眉公像讚

傑賢公像讚

陸炳東

祥光撲眉宇浩氣滿丹田芝草不擇地栽培別有天

其貌頎然其神儵然淳和氣質澹逸性天挹清於龍津之澳濯秀於樵山之巔壯嗜書史老隱林泉庭幃敘樂俯仰無愆滿團喜氣猶可想其心地福田

明軒公像讚

林紹光

貌古人之貌心古人之心泓然而澂幽然而深峭然如天

台萬仞壁立乎千尋吾試以其宅身也比之在璞之玉其應物也比之在鎔之金而猶未得其似也其斯異乎湖海之士而扶輪乎大雅之林

明軒公淑配譚孺人像讚

林紹光

敬羨論逸勞乃生在闕闕孟氏佐傭春操作自怡悅幽閒有本性貴賤若一轍提杵朝抱霜機絲夜當月庭際挺幽蘭枝葉相當接不辭灌溉勞汲此井泉冽蘭蓀報君芳泉冽比君節芳節萬古遺斯容乃難沒

卓亭公像讚

內姪 梁大選

其色溫然其志卓然億則屢中其才充然舉為鄉正其族帖然不為爵榮處之淡然不為貨侈守之欲然軒軒然穎上之管子飄飄然羅浮之葛仙

南海廖維則堂家譜

卷二 藝文

五九

福堂公像讚

并序

史 淳

公諱經成字昌善號福堂余夢生同年之大父也世家南海良寶鄉幼而岐嶷長好讀書雖聞達不求而鄉里稱善至今猶傳頌焉贊曰

岸然道貌玉質金相學養以純行操夫良幽光潛德隱而彌彰緬惟清風厥後宜昌

福堂公淑配馮孺人像贊

史 淳

孺人系出南海滕涌鄉乃福堂太年伯淑配也秉性和柔持己約儉馭下無疾言遽色處人能含忍宏慈蓋有古賢母風焉贊曰

古稱閩德秉淑含貞門庭肅穆家室和平何期賢母猶仰  
典型麟祥鳳文永播芳馨

恬然公像讚

丁善慶

人富於財難富於善人富於善斯富於財財善相濟陰德  
由來惟恬然公會讀家傳敬祖敦親樂施不倦造就羣英  
人爭覲面頭銜臬中冠帶眉翁披圖拜識道氣冲融積善  
餘慶是福德之柄美矣休哉是宜千百世垂澤之長尤羨  
千百世流芳之永

恬然公淑配周孺人像讚

孫日萱

善氣所開自閩中來相夫達德家樂春臺柔順而正太和  
資胚子孫振振餘慶悠哉

南海廖維則堂家譜

卷二

藝文

三

介然公像讚

丁善慶

伉爽其性卓犖其行奮然以興持籌決勝逐時而不失山  
鳴而谷應嶺表之烟樹雲深洞庭之江波晝暝徘徊焉眺  
望焉惟爾後昆當思報稱

介然公淑配譚氏孺人像讚

龍元儼

嚴而肅和而睦事姑以敬御下能淑諄諄然以情爲懲懇  
懇乎以儉爲勗縈葛纍綏福祉錫祚允宜孫子

介然公庶妣黎氏孺人像讚

龍元儼

肅肅其躬凜凜其儀溫恭淑慎以爲德基儉而不嗇愛而  
非慈其操心也密其慮也微夙夜不怠兢兢自持惟酒  
食之是議蔭蘭桂而叢滋

遇潛公像讚

翁之貌兮和藹端方翁之品兮恭儉溫良門墻桃李茂才  
魏科階庭蘭桂挺秀交柯隱而未見進修乾乾遯世無悶  
知命樂天未嘗干祿澹泊襟期史修隱逸曷採厥辭  
先生鑄品美瓊玖磊落當胸吞二酉藻思挾天風雨奔雄  
才捲峽蛟龍吼淋漓紙貴掩南金鞞鞞聲光干北斗角賦  
敲詩稱豪雄曹劉落魄王楊走風流文采樂年年天與為  
徒道為耦

佩堂公暨淑配倫孺人像讚

廖 翹

望之即之風範宛然依稀不見蓋已八年惟叔厚德樂善  
不倦宗族姻親吹寒煦暖析產讓財臨終焚券至今述者

南海廖維則家譜

卷二

藝文

三

猶為嗟歎媿母賢淑素明大義克相吾叔以成厥志當時  
內外惟叔取平顧茲後起追慕老成百世而後此其典型

藹然公像讚

廖 灼

氣靜而穆神和以肅泊然而寡營充然而自足其與人也  
雍容而不迫其處躬也謙卑而自牧惻悞無華質直不假  
非有意于君子之謹言而自合吉人之辭寡

東山公像讚

廖 灼

達能料事敏乃有功世故諳練識見融通習于椽吏勤以  
奉公使假以柄應變不窮恢恢之量狷狷之衷仰瞻遺像  
緬想英風

簡居公像讚

陳啓邁

性靜以逸挹之愈清才優以裕叩之則鳴不爭市利不逐  
時名充然自足恬退寡營儉以養福淡以攝生隱居自樂  
書史怡情德高祉集善積祥徵拜瞻遺像如接生平

樸存公像讚

全慶

江浦之晶龍津之英篤生奇傑卓犖崢嶸讀萬卷書晦跡  
遺榮挽三石弓不取成名拂袖而起薄遊漢荆落落湖湘  
孤鶴一鳴棹返南天入事父兄有書訓子財粟匪營果償  
父志令嗣蜚聲新栽桃李終倚梁楹衡文偶暇像拜先生  
取存梗概畧敘生平

自題小照

蘭田

少年失學遭逢頓挫寄跡公門碌碌閒坐清茶淡飯自安

南海廖維則家譜

卷二

藝文

三

貧室人交謫愚而懦晚來商賈學經營努力於今弛負荷  
浮山有約經年度樵路無多盡日過藥爐茶鼎隨時玩白  
鶴青松歌且和愛兒童勤督課耽經史免昏惰人生知命  
樂偏多何必定區區帝臣王佐我想少年志氣十分高今  
老些

羽儀公像讚

鄧紹良

觀公之貌怡然可親緬公之德曠然天真繩墨自守規矩  
克循心懷利物志切濟人行年五十和顏若春非此妙筆  
孰與傳神

虛谷公像讚

王福康

道氣冲和遺容靜穆德秉溫恭卑以自牧屏跡遊心樵山

之陰溷跡塵市與俗浮沈諳歷彌久才華不露明哲自全  
植德孔固緬想高蹤披拂春風載與俱永令聞靡窮

南海廖維則堂家譜

卷二

藝文

三



九如公行述

姪士坤

嗚呼伯父竟溘然長逝耶承重孫錫培偕叔成瓚士瓊苦  
次哀號扳無所逮然伯父爲人其生平有不可泯沒者粗  
述梗概以備摺紳先生大人採擇焉伯父諱清字應亮號  
九如乃宋凝真始祖十六世孫南輝公之長子也南輝公  
生子三人伯父居長次先考璧如公季三叔父藹如公伯  
父少喜讀書時祖考貿易省垣祖母家居紡績而伯父攻  
苦家塾爲善孜孜環堵蕭然晏如也迨先父與三叔父稍  
長伯父不忍祖父獨自勤勞於外始棄儒就賈教訓諸弟  
孝友甚篤祖父母顧而樂之竊幸有子焉乾隆庚辰秋祖  
父享壽六十有八以疾終伯父與先父三叔父哀毀骨立  
孺慕彌深服闋之後兄弟共出營生伯父則往來漢鎮涉  
歷江湖沐雨櫛風辛勤備至繼乃居貨佛鎮慨然膺西貨  
行主人重寄忠信勤慎遠邇商賈恒倚賴之此坤不及見  
而先父及先叔父嘗爲坤輩述之者也伯父孝本天性雖  
身爲貿易時戀高堂庚子以後就養家居順事無違以故  
祖母年歷期頤而恬怡自適健逾壯歲伯父善體親心以  
家計稍康卽與先父三叔父謀議建祖宇定妥先靈閔壬  
寅癸卯踰年而葺事且自感讀書不成因偕兩弟援例成  
均少遂顯揚之願是時祖母享壽百袞開一伯父亦週花  
甲遂製錦稱觴戲綵爲壽伯父與先父三叔父積數十載  
勤勞振興家道一門篤慶其樂融融倘亦爲積善之報耶

甲辰乙巳洊遭歉歲伯父欣承母命兄弟倡捐賑饑使里黨戚族賴以舉火者不計其數丙午祖母棄塵伯父與先父三叔父竭哀盡志守制家居時述先人之格言訓子姪以恪守誨諭諄諄言猶在耳也伯父生平動必以正事親則愉色婉容而褻躬則嚴氣正性愛弟則推心置腹而處衆亦酌理準情凡見人有安於頽惰者必深加戒諭有人以事相質者必勸以守正推究原委盡言無隱以故鄉隣倚爲柱石宗族重其端方遐邇君子皆願與之交我廖姓族衆蕃衍凡總理族務約束子姪皆稟命於族正伯父以衆共推舉不釋故勉肩斯任自是敬宗睦族排難解紛莫不秩然可觀肅然有紀至家居無事仍不忘展卷見讀書

南海廖維則家譜

卷二

藝文

三

人倍加親愛訓飭子姪亦復餘力不遺卽堂弟士瓊年甫弱冠鬢序有聲此莫非董勸之力也伯父之克修厥躬者老而愈勤則其享有厥福者固當未有艾也乃自庚戌三叔父云逝遞及己未先父又復去世伯父疊抱手足之痛傷心雁行雖曾孫繞膝克享遐齡而終莫釋其友愛之情繫懷彌切邇年以來精神稍憊而諄諄以勤儉垂訓則無或少休今歲九月偶染微恙偃息在牀遂論各子姪孫回家環立囑曰勤儉爲起家之本孝弟爲作德之基如此爲人方克自立死生有命予亦何悲及望日卽囑各子姪孫爲整衣襟勿使偏頗至十六日子刻從容正冠而逝嗚呼山父其竟溘然長往耶苟非生平信道有素涵養有年豈

易得此全受全歸而精神凝定如此者耶噫可哀也已伯  
考生於雍正癸卯年正月二十四日寅時終於嘉慶壬戌  
年九月十六日子時積閏享壽八十有三

南海廖維則堂家譜

卷二

藝文

奕

樂賢公行述

姪士創

嗚呼先伯考竟棄余小子而長逝耶姪士省承重與二長兄正立苦次之下哀號莫及創屬猶子謹述先伯考生平行事質諸戚友先生大人垂鑒焉先伯考諱文佐字昌昭號樂賢迺先祖考揚眉公先祖妣阮氏安人長子也揚眉公生五子先伯考居長次二伯考仰賢公季嚴父鳳昭四叔父簡昭五叔父錦昭皆同產也伯考性和厚敦孝友少力學以弗克自樹立迺從先祖考入臬署學吏治恂恂有儒者氣慎終如始罔不軌于法卒爲列憲所器考授今職厥後先祖考遊於順邑侯賓之爲邑侯殫心規畫而伯考日侍其側念父勤勞凡有謀猷一以身代亮誠布公爲順南海廖維則家譜卷二藝文

南海廖維則家譜

卷二

藝文

七

之人排難解紛不一而足時有兩姓構訟牢不可破各挾重賂以求伯考正色却之爲之開誠調劑後卒和好前後處順五十餘年迄今順人感德之歲丁酉先祖考妣齊眉八表蒙諸戚友製屏觴祝伯考偕諸伯叔父承歡膝下致足樂也迨庚子先祖考辭世伯考茹戚含酸痛悼迫切又慮傷厥妣心故隱忍節哀承顏順志其養生送死有如此者吾聞之君子將營宮室宗廟爲先憶四世祖志遠公入世祖國香公苦無嘗積向未創建祠宇伯考爰集房衆設法竭力綢繆拮据盡瘁自丙午至庚戌越五載堂構先後落成先靈之妥繫惟伯考是賴丁未後連遭歉歲族衆嗷嗷伯考重捐倡賑子姓忘饑其仁心之所發者然也維時

祖妣年居九旬伯考日與諸伯叔父盤桓晨夕順親愛弟  
歷數十年如孺子及二伯考卽世伯考惻然如失左右手  
又恐妣心未釋更爲和顏以慰悅之甲寅又效萊戲承色  
笑焉當是時少長咸集而季弟適以遊泮聞天倫敘樂四  
代一堂伯考方顧而樂之比祖妣以是年冬仲辭世伯考  
哀傷孺慕居處之節一如喪祖考時蓋自庚子以來憂樂  
迭膺伯考益無志于當時矣迺退隱田園日與族姓鄉黨  
懽欣洽比人以爲有古處風復憂鄉族之不如若也又爲  
議立維安保良義社獎善去惡正俗型方社有餘息宴高  
年於歲首校秀士以文章日就月將薰其德而善良者又  
赫赫在人耳目中矣伯考智識宏遠內外澄澈性方嚴人

不敢于以私及其接物也又謙光可挹無城府無豁壑平  
居誨人以善獎勸不少休以故族屬盡爲傾心族務賴以  
肅理諸父叔子姪勸以節勞頤養而伯考精勤弗輟嘗語  
人曰爲天地間有用人不可不爲天地間作有用事徒利  
於己無益於世吾弗爲也故見義勇爲遇物垂誠嘉慶己  
未伯考年登古稀諸戚友爲之製錦慶齊眉當時曾孫繞  
膝猶諄諄以勤儉忠厚爲訓此其植基孔固天錫純嘏當  
未有艾也乃以微疾不起卒前一夕尙與諸父叔子姪談  
笑如常更漏將殘偃息在几忽爾不寧亟求醫救藥延至  
翌日子孫環立弟姪侍旁牀褥安然參苓罔效時將及酉  
溘然而逝嗚呼痛哉逝之日鄉族之流涕者甚衆行道之

人爲之太息者不絕噫伯考愛人以德其真有入人之深  
而人出于不自覺者耶割不忍其湮沒謹述一二以道其  
實云耳先伯考生於雍正辛亥年六月十八日未時終於  
嘉慶丙寅年九月十一日酉時積閏享壽八十有一

達亭公行畧

姪孫 翺

房叔祖達亭公齒德爲吾宗望今秋竟以疾終嗚呼以公之篤行積善詒謀繼述年登大耋卒以考終在公亦復何憾而悵望典型老成凋謝吾宗族之流涕追述太息歛歔其情蓋烏能已翺生晚不能悉公行事然親承德宇聆其言論訓誨亦固有年參之族姓鄉閭所稱道及其嗣君之所追維庭訓述其梗概庶識公者并知公之所以爲人謹按公諱玉瑩字華祚號達亭曾祖存真公祖賦彝公父善藏公皆有厚德公自少至老身所行事及教子姪悉遵前人遺訓善藏公生二子長卽公次果亭公無嗣早卒有女一人公以次子爲之嗣而撫其女如己出預營葬地於果

南海廖維則堂家譜

卷二

藝文

七

亭墓旁曰吾他日同氣猶相依地下也其孝友出于天性母梁氏孺人有足疾公日侍寢處扶持出入不離左右者數年自果亭公外凡伯叔兄弟姑姊妹之無依者皆推所有處置之無失所家僅中人遇歲歉常自節損以周貧乏凡鄉中脩建利濟事必鼓舞倡勸務求其事之成而後已公爲人和平渾厚與物無忤平生未嘗言人過失雖素所不悅及輕侮之者皆容忍不與校人有善則稱揚獎勸不啻口出與人謙恭欵洽卽極卑幼必加以禮貌又詼諧善謔談辨肆應各能盡人歡故士農工商以至販夫牧豎凡從公遊者無不稱慕愛悅少業孺攻苦力學自善藏公見背經營家計遂習曹掾更徙業就賈而性終喜讀書樂與

士大夫遊暇則作詩爲文以自適所作建文閣脩石路引及遊戲之什皆懇到爽朗可誦而博聞強記凡少年所讀經史古今文一時同遊名士撰述與平生所作詩文隔數十年猶能背誦朝等每候問起居於西園園植花木公日灌漑其中有古荔二株至則留坐樹下煮茗談論亶亶終日不倦吾族千餘人宗法最爲整飭自族祖揚眉公九如公豪甫公伯父廣華公恬然公介然公昌昭公鳳昭公叔父佩堂公及朝之曾大父迪康公大父玉堂公諸前人數十年中經營創垂日以光大公未嘗不身與其間各家子孫多後起不見或見而未能盡悉公每於會集之際追述前事纖悉覲縷皆如日覩聞者莫不拱手敬聽每一見公

如自見其祖父焉朝嘗欲與族叔士瓊及弟姓灼等脩訂族譜敬述前人締造之艱章示來世以爲考事質疑非公莫能徵信蓋族中年高德劭身歷數代而諳於前後族務者惟公一人而公已溘然長往矣公精神強固貌狀魁偉豪飲健啖聲如洪鐘性坦易磊落酒後高談雄辨未嘗及亂語少寂卽鼾聲大作素少病惟嗜飲得足疾歲間作多飲佳釀則愈得寒疾數日遂不起先是公繼室羅氏孺人臥病數月屢瀕危殆至是殯殮已畢後公四日卒公卒於道光元年九月晦日享壽八十有三

今上登極 恩錫耆壽授修職郎



恬然公行述

姪銘

嘉慶十八年冬十月己亥伯父恬然公以壽終于正寢二兄方在哀毀銘等年少不能悉知伯父美然以伯父之盛德久爲鄉閭所共仰而善行不稱無以表白當世是銘等之所大懼也謹以銘等所見聞隣里所稱道及二兄平日趨庭奉侍記憶難忘者爲戚友告焉謹按公諱觀鐸官諱金聲字擎儔號恬然例授按察使司照磨世居南海縣江浦司龍津堡良寶鄉曾祖考懷德公會祖妣關氏梁氏祖考拙菴公祖妣關氏馮氏考明軒公貤贈登仕郎妣譚氏貤封太孺人弟介然公諱金榮先公六年考終登仕公沒時公年纔弱冠先君介然公纔十餘歲是時家計竭蹶公南海廖維則家譜

卷二

藝文

三

慮無以爲太孺人菽水歡乃棄儒業與介然公權子母公常坐賈羊城介然公則行商漢口兄弟同心協力二十餘年而家漸饒性孝友白首怡怡猶未忍析產事太孺人起居飲食養志無方遇疾病醫藥奉侍必躬親雖有婢僕不以代也公雖居闔闐然于財利頗恬淡知足不似世之營求無己者年四十餘卽歸隱家居奉太孺人以爲樂無事則放情山水旁及青烏術凡貨殖事皆以付諸子弟不問若事外人故平生善行於里居時爲多公精神內裕事無大小必身親經畫而關於祖宗鄉族者留心整飭旋里後卽先建小宗祠以祀其先人而後乃敢治第宅始祖祠歲久朽蝕族人欲擴而新之而所費不貲公先捐金千數以

爲族衆倡鉅細諸務以身專任不啻家事二三年中幾無  
休息迄祠成而鬚髮盡白又山墳之頽圯者以次脩理嘗  
業之糜耗者設法樽節勞心焦慮無日不以祖宗爲念臨  
終時遺言不及家務所諄諄詳囑皆宗族事也然公雖忘  
私輸已勤勞衆事而常不自以爲功自建設外凡村中橋  
梁道路有碍于行者不假簽助輒暗爲修築久共乃知公  
所爲蓋其精神淡定遇事不動聲色而懇摯肫誠求其心  
安而後已其性然也生平寡所嗜好與淑配周孺人相敬  
如賓不置妾服食皆淡薄樸素無華飾而輕財好施急人  
之急丙午丁未間歲大饑捐金賑濟存活不下數百人平  
時宗族有困急者度其不給不俟告訴輒先問其所需而

恤之戚友稱貸未嘗少吝不還亦不問久迺并忘之歲辛  
未 始祖祠落成而公適逾七十諸子捧觴上壽族人德  
公建祠功欲製錦爲祝公念族中年高而無子弟及有子  
弟而貧不能稱祝者不少且樂在一家不如合舉族以爲  
樂乃諭諸子及族姓之有力而家有高年者使劇金合力  
復脩聯壽之禮聯壽者合族中週花甲以上者開屏而共  
祝之蓋本族故事不舉行者三十年矣至是春酒介眉蒼  
顏皓首者百餘人行禮畢皆舉公上座首謝建祠勞而公  
歉然不自居也初太孺人九袞開一戚友製錦稱觴公與  
介然公欲使優伶演劇以爲老人娛太孺人曰演劇徒費  
金無益不如以施貧乏於是困窮孤寡沾惠者千餘人蓋

其仁孝所推積于庭闈者非一日矣處世優容大度無峻  
言忤色雖卑賤待之一以恩禮當公前子婦無敢有苛責  
婢僕者而性尤愛重讀書人凡子姪有可造者必務作成  
之銘等少時先君介然公經商在外庭訓常踈灼自初  
學以至成名皆公教也族姪鼈少聰穎其父亟欲教之而  
貧不能給公歲資以膏伙且令與灼同學從師數年後鼈  
與灼前後補博士弟子員公喜甚而屬望彌殷每揭曉之  
夕輒徬徨不寐以俟好音及榜發報罷口雖不言而失意  
之狀似較當局者尤甚故鼈與灼深以未得一第使公及  
見爲恨公爲人和平溫厚渾然不露圭角雖甚喜怒頗無  
所形於色所行善事皆未嘗使人知不責報不近名并不  
計其如是乃合也惟行其心之所安而已平日以忠厚待  
人亦以此或爲人所欺然以欺而愈形其厚縉紳先生與  
公遊者每謂鼈與灼曰他人之善多從學問得來公之善  
全從天性中流出有時過當處正人所難能吾輩雖讀書  
十年不能及也素善調養少疾病年七十餘遊山常終日  
不倦少壯者往往不能從偶患瘧數日轉痢藥無效遂不  
起嗚呼以公之存順沒寧子孫林立在公可以無憾矣而  
銘等所瞻依宗族所愛慕者其恨則豈有窮哉公生于乾  
隆戊午年十一月十二日享壽七十有六淑配周氏例封  
孺人學堂鄉太學生洪許公女子二

佩堂公行畧

姪 灼

嗚呼佩堂叔竟溘然長逝耶其孤子錫池錫濤苦次昏迷既不能親筆硯迪前人光其同堂弟房叔士瓊又遠赴禮闈無由擦觚縷述灼忝房姪且先人同事有年於叔之行已待人處家應務有備悉而習見者爰僭臚梗概以備諸戚友縉紳先生大人垂覽焉房叔考諱士珩字翰潮號佩堂迺房曾叔祖南輝公之孫房叔祖國學生藹如公之子元配陳氏安人出也南輝公有子三長國學生儲贈文林郎九如公次國學生璧如公三藹如公諸孫七叔以同堂計序居五一門樂敘融融洩洩鄉人美積善焉叔賦性真醇稟姿聰慧少失恃藹如公續娶馮氏安人叔奉事惟謹

南海廖維則堂家譜

卷二

藝文

七

無異所生自出就外傳皆與諸兄負笈從師講習有得歷應童試不售乃偕同堂兄士坤援例成均並赴鄉舉棘闈鵠立識者有二難之目焉庚戌三月叔繼慈以病告終叔哭泣盡哀慘然守制而藹如公亦以老病歸隱叔遂家居奉侍朝夕牀褥未嘗廢離几醫藥所需罔弗竭力至九月復遭大故其哀毀骨立有慘動鄉人流涕者觀其事庶母麥氏則承順終身撫季妹已故後猶殷勤卹贈亦可見孝思之不匱矣迨服闋而身親家計始事謀生凡有所爲必稟於兩伯考而後行無擅專者時堂次兄服賈遠出經年未返叔慮貽兩伯考憂乃請命沂漢陽走西粵所至皆奉揚先人信義而孚之以誠以故履險如夷旅占射雉卒與

兄同賦還歸然叔本無市心也返旆後遂不復出惟於省佛鄉落間隨地夥謀生業使子姪各執事而董蒞之斯亦創垂之可繼者已當兩伯考之爲均產業也議循房分析而三之叔以三則已居一而獨厚堅持不可曰是無以體先人志也先人與伯父夙夜勤勞非爲私計誠欲爲祖宗高大門閭俾諸子姪各得所循守今必拘分鼎足則薄諸昆弟而偏厚一人獨不患田家之荆樹萎耶兩伯考乃曲成其意而各兄弟親戚亦莫不嘖嘖以義稱及兩伯考於己未壬戌先後去世堂長兄亦年將花甲而殂所有殯葬經營叔皆含悲盡瘁佐理無失邇年諸昆仲繼逝盈庭幼孤叔復抱痛護喪舉無疎忽嗚呼世之處安樂而見性情

南海廖維則家譜

卷二

藝文

七

者順適康甯天真發越誰不睟然至於患難死喪之戚則非滿腔血誠鮮能懇切而周到也如叔之處變故非仁孝根心曷克若此嗣是一切家事叔皆任勞俾堂次兄頤養天年堂季弟公車奮志而諸子姪亦莫不藉以得所營生至其外祖母家日就衰替孤苦無依叔爲贖屋以居歲給米錢凡養生送死直身任之歷廿餘年今則幼者皆成立矣歲已巳鄉人歎收族眾嗷嗷叔倡捐賑設法勻施又復自捐再賑由一方以至一族無菜色者是皆叔之實心行惠也至於躬率族人製錦稱觴爲舉族諸父老樂羞黃耆又弗克辭族正聯宗立約俾閭族諸子弟共守家規推而賙卹昏喪扶持鰥寡砌修途路整飾里居何非赫赫若前

日事也先是叔之先考暨兩伯考創建南輝公祠以申孝  
享顧祠只兩進後襯尙虛叔乃與各弟兄及諸姪合力營  
謀續建後樓一所巍然屏帳洵巨觀矣又我族祖祠久憂  
剝蝕灼嫡伯考恬然公首倡捐建叔復力爲襄助於是除  
舊布新亦添建後樓一所堂皇聳峙庶幾栖靈而聚族焉  
工竣後適癸酉科房叔士瓊獲領鄉薦繼而丙子科房兄  
姓亦領鄉薦連捷禮闈撥部供職又繼而已卯科族兄翺  
復叨領解數年之間科名鵲起論者皆以兩後樓之建爲  
催官而歸功於始事亦孰知叔與伯考營建之心祇以妥  
先靈而非有私倖也且叔嘗與堡內諸先生謀建闔堡社  
學矣鳩工庀材未嘗告瘁及落成而捐貲起會更無吝色  
南海廖維則堂家譜

卷二

藝文

毛

凡以聯鄉誼而興文教所見在遠大也邇來退養優游恬  
淡自適披吟不輟閒涉岐黃常與堂次兄酒食笑言互敦  
友愛又厚飲堂季弟北行使無憂內顧規子姪以先人遺  
訓勉族黨以循分有爲真意滿懷謙光可挹於讀書人則  
尤加愛敬凡宗族戚友之高擢巍科者皆嘗藉其資助焉  
若夫心氣和平智識圓徹解紛排難各極安詳則又有不  
可勝述者癸酉冬自以科名未遂志切馳封遂由國學生  
例授今職擬效焚黃之報少酬保赤之心孰意今春偶患  
頭風愈而復作雜出他症醫藥無功延至四月初旬更患  
呃逆脾泄叔自知不起乃命諸子姪環立各子教言親檢  
契章分給收管又檢各兄弟親戚借貸未償之約悉召而

還之且諄囑忠厚做人勤儉持家教子孫讀書爲善至十  
一早諭爲整肅衣冠無使偏頗及午刻遂從容而逝當其  
彌留之頃猶憮然以不見房叔士瓊爲恨嗚呼叔殆臨終  
而不忘禮闈之人耶彼赴禮闈之人亦烏知叔之人鬼判  
於斯時而音容杳於此日也哉噫可痛已叔生於乾隆甲  
申年五月二十日戌時終於嘉慶庚辰年四月十一日午  
時積閏享壽五十有九 例授儒林郎候選布政使司經  
厯

卓亭公墓誌

公諱觀裕字廣華號卓亭十六世國學生珍堂公長子也性剛毅見義勇爲素有遠志由太學生晉職藩佐尋以事親教弟不果用於世然時與諸父老整飭風俗排難解紛凡鄉大小事悉斷以義故數十年來人多仰之嘗有眾匿叢薄中博偵公返豎指搖手眾卽匿散其嚴畏多類此公又以嘗業爲祀典所關歲久跡荒遂爲清析畝澮詳明邱段爲久遠計於今賴焉至於忼爽好施修祠建路捐貲賑濟諸善事則又老而彌篤無足爲公深異也卒之日鄉族無不歎息流涕助葬者填衢塞巷迄今父老談及往事猶思公不置云公生於雍正甲辰年十月二十二日戌時終於乾隆壬子年十月初八日子時享壽六十九歲淑配梁孺人純儉孝謹先公而歿生於雍正癸卯年正月十二日丑時終於乾隆戊寅年三月二十五日未時享壽二十六歲庶妣李氏周氏葉氏何氏始葬於西樵百子堂後改扞蟠龍岡



簡居公墓誌

弟 灼

公諱端隱官諱其中字騰耀號簡居世居南海良寶鄉迺  
疑真廖公十八世孫恬然公之長子也公性敦厚儉樸爲  
鄉里推重少力學不得志於有司貢於成均長遊楚北晚  
乃退居鄉井事親友弟藹然秩然一家和睦孝友克施誠  
門內之樂事也夫人家庭之內能盡其職分卽居位行政  
亦無以異使其得志於時當必有所設施豈必區區於時  
名哉臨終時語諸子云汝兄弟無重貲財而薄兄弟也觀  
於此言知遺訓於後人者深矣今弟及諸子姪輩敢一日  
忘哉公生於乾隆壬午年四月初一日申時終於道光十  
四年五月念六日子時享壽七十有六與淑配周孺人合  
葬於西樵紗帽岡坐乙向辛兼卯酉之原孺人生於乾隆  
癸未年十二月初四日巳時終於嘉慶丙寅年十二月十  
四日未時因誌其墓而銘之曰

公敦古誼 然諾不欺 孝友之行 門內克施

大科東股 紗帽峯馳 氣凝脈聚 窀穸於茲

幽宮永蔭 令德長貽 鬱積磅礴 烏奔年彌

樸存公墓誌

弟 灼

公諱端修官諱其正字誠耀號樸存系出南海良寶鄉始祖廖凝真公之十八世孫恬然公之次子也公性敦厚和平與人無忤然諾不欺周急濟乏咸有父風而尤篤於孝友自世俗日渝而弟道之不講久矣先考介然公經營漢鎮每於其歸之日與兄恬然公肫誠和藹溢於言表而尤於財利無所較以故白首無閒然公初客漢陽繼遊羅定後乃退居佛山其服賈於外與介然公同於其歸之日與兄簡居公和悅歡洽不計財利白首亦無閒然去歲夏簡居公屬纊時余兄弟輩環侍諄諄致誠曰汝等無重貲財而薄兄弟也余卽書爲家訓今春樸存公之歿也余以禮部

南海廖維則蒙譜

卷二

藝文

全

試在京聞訃不得親臨其喪余於弟道滋愧矣夫古人有以兄喪而假官歸者今豈有是乎且夫弟未有不本於孝者先考介然公與樸存公以不能久侍親側故孳孳以致其友愛於兄而兄亦克知其意以卒成其養此則樸存公之隱衷與先考相印合者也公偉軀容善騎射再試格於有司決然舍去援 例授儒林郎布政使司理問性尤喜讀書每見士類欣然歡接臨終呼二子而告曰汝輩當勤讀書也餘無他言公二子長衡平淑配周氏出次祖杰麥氏出今衡平食餼郡庠當砥志礪學勗弟成材思勉以副之也公生於乾隆庚寅年九月初十日寅時終於道光乙未年正月十五日酉時享壽六十有六以是年十二月初

七日巳時奉柩安葬於西樵大科黃蛇岡坐巳向亥兼丙壬之原爰誌其墓而銘之曰

行不尙奇 庸德維難 善之可師 邇至遠殫 惟公德之翼翼兮 故前哲之所安 雖性稟之夙優兮 亦聞風而敦寬 大科之峯兮雲翳鬱 永蔭幽宮兮護深窟

清故定襄縣知縣廖君墓碣銘

曾 釗合浦  
教諭

君諱翔字鵬卿姓廖氏南海人曾祖迪康有隱德事在邑志祖文璧諸生父崇衣 覃恩贈文林郎君少英俊甫弱冠卽以文名於時嘉慶二十四年省試第一越八年舉進士第出知山西定襄縣事君素講陸王之學又官山西其地北控雁門西據潼關古稱四塞之國君奉檄所歷必究其山川扼阻益以經濟自期然狷介不肖徇大吏意求進取居久之歲大祲定襄米石錢至萬君請發倉平糶故事減時值三之一君以爲米石錢七千猶不足濟民乃抑市價以報大吏旣宿憾君不親附又以他縣米值皆昂獨定襄值不及萬錢疑爲冒賑大怒委員按之當是時飛檄如

南海廖維則家譜

卷二

藝文

全三

震民心洵慮君得罪且去則走白於委員鳴其故頃刻間數千人委員以聞事乃寢然君終強項如前日未嘗幾微有患失意座主吳侍郎其濬嘗稱其才於巡撫某又以書語君君婉言以不願遷調辭或勸君輒面赤持不可獨視民疾苦則切切如恐失之有訟獄者溫言譬諭務得其情以解或以逋賦逮輒寬其期遣去不施朴笞以故民不忍欺循聲載道口傳以熟大吏每悟方且倚用遽遭疾卒於省邸年五十有二時道光十六年正月也士民哀臨數千萬人欲祀君名宦祠格於例耐其主晉昌書院嗚呼以君之能文且才旣登第出爲邑宰七歲不得遷將遷矣遽卒不能究其施可痛也已生平好學雖簿書委積不廢經

史著詩繹尚書繹四書繹如干卷秦隴行紀一卷皆可傳  
娶林氏生子男一人大廷女一人君卒之明年十一月某  
日葬於西樵白山之原銘曰

騏驥弊於鹽車杞梓摧於構櫨闕戟犀渠用爲儲胥鬱  
光不舒以昌其著書

渭川房家譜序 雍正元年

煒先

族必有譜所以誌本源而辨支派也亦卽所以聯支派而溯本源也譜大宗以篤其族屬詳分房以念其所親二者交相需而不可闕焉邇我始祖自河南而來宦遊東粵卜居良寶傳至我九世祖渭川公生十世祖海門公俱以忠厚傳家爲世推重海門公生韋弦公董弦公兄弟誼篤友愛數十年未嘗析產董弦公沒無嗣韋弦公博涉經史文章學問爲世所推而未得見用屏居鄉里訓迪後進倡舉冠禮科金積貯期創建始祖祠以妥先代志未畢而沒長公迴涵公起而繼志規畫措置皆親裁定經營竭力而祠克底于成復置管業以降祀典立禁例以善族規其爲功於後人匪鮮矣迴涵公弟衷和公歷三傳至賦文公兄弟四人後先淪喪均無嗣續深爲痛悼伯考悅常公及先考存真公生我兄弟叔姪已二十餘人矣擬欲繼嗣苦難遍繼且叔考抱遜公著有遺言謂前代具有祀祀之條合以親屬付託之意囑入本房與韋弦公同祀永遠勿替每歲清明展墓七月嘗祭享祀無缺庶少盡吾後人致敬之心上不愧先人慈孝友于之誼外無負親戚懇摯負託之意將後日孫支蕃衍承先烈而式廓之森然雁序念出同源油然而孝敬生藹然而禮讓接重本篤親無忘所自是深有望于後人也謹將諡號忌辰及墳墓詳誌于後

賀豐房修建五世祖祠序

嘉慶十九年

定魁

事以時起業以謀成非偶然也我始祖當南宋時宦遊東粵家于良寶鄉歷元明以至

國朝支分宗別派衍千餘既建祠于良寶而爲大宗矣惟我五世靜逸祖壻于賀豐梁氏遷居就婚後遂爲賀豐長房之祖自五世傳至十二世丁衆尙寡未能創立宗祠以妥先代遞康熙二十二年豪錫公誠錫公賢錫公慨然奮興以爲己任尙所謂時起謀成者乎於是度地經始籌謀設法量力以輸踴躍以助衆情鼓舞而祠以成此以見前人委曲經營創造若斯之難也延至今日百有二十餘年矣棟桷朽蠹傾折堪虞又以從前建造前後兩楹分時

南海廖維則堂家譜

卷二

藝文

六

續成坐向微異謀所以新之復籌度積貯自嘉慶四年至十七年始定議以集事鳩工庀材樸斲丹雘週歲乃能告竣是歲癸酉族弟士瓊適領鄉薦落成之日正祭告之期歡欣鼓舞慶洽孫曾則他日之後先繼起或於此而爲之兆也故書以記之其時倡始爲偉賢翁裔賢翁而余爲之繪圖經畫其間分理庶務者爲作雲作文揚萬成杰宏秀作和成芳瓊秀沃萬而裔賢翁則更總理度支始終其事并詳誌之以示後嗣

送鹿儕入都序

翺羽皋

去歲嘉慶丁丑鹿儕舉進士授工部主事省親南還今年復入都供職鄉里爭羨慕之然此固不足爲鹿儕重也余與鹿儕及同族弟秋藻束髮受書卽共以文章道義相磨切意氣議論不少假有過失立相督責余嘗謂秋藻吾人能窮爲名士然後能達爲名臣鹿儕以爲至論三人各期遠大休戚相關解衣推食不啻骨肉弱冠後秋藻遊學於外余與鹿儕家貧皆於鄉中授徒糊口同處窮困動心忍性志氣益堅以故兩人相契尤深相處亦最久又數年余出事交遊與朋輩角逐文壇聲氣日孚名譽頗著而鹿儕獨困守窮鄉姓名不出於閭里余深慮其索居荒廢寡所

南海雜則蒙譜

卷二

藝文

七

見聞無以開拓其胸臆秋藻曰鹿儕器量深沉吾輩皆莫能及鹿儕不早爭時譽積之久一發將不可禦今果先余與秋藻而騰達然則畜極而通其中藏不易窺者其發見常不可測理固然也鹿儕爲人樸茂真摯作事稍濡滯或少英發余與秋藻常以爲言然真意確然義所在利害不能易余嘗謂士大夫功名氣習惟事粉飾日趨于僞能任天下事者必在較然不欺其志之人余結交頗廣所識一時名流爲文人爲智士不下數百輩而求其肝膽可託堪以氣節事業相期許者常寥寥不可得憶余與鹿儕年少家居時聯牀抵足風雨悲歌意氣橫厲或酒後耳熱狂吟村郭高談抵掌旁若無人人皆曰笑而輕之及鹿儕平地



青雲乃始驚異且誇榮焉此人情固然而不知吾輩之相期者固別有在也鹿儕臨行與余及秋藻執手眷眷以秋榜公車爲會雲龍追逐會合有時臨別惘然此兒女子事富貴仕宦亦俗人之見而不足道故厯序平日之所期許者而與秋藻作詩紀之以贈其行

贈廖羽皋序

曾 釗 勉 士

地方百餘里受治之民百億萬人小獄訟則聽斷之有大刑誅然後質成於大吏然大吏往往據以報部不易一辭故得其人則民蒙其福不得其人則民被其害知縣雖七品官耳權亦重矣哉雖然知縣之上有州府有道有使司有巡撫有總督知縣之遠者境何私人致飾廚傳供給惟謹又或歲上省日月惕於道路舟車之費不貲其在省垣則日伺於知府道司巡撫總督之門卯出而未歸精極而神傲重以遊燕耗其餘時吏胥滯其復自由是案積而不結獄留而不解奸民知其然更爲株連以陷良善民得對簿於知縣前者罕矣况達其情乎民能達其情者罕矣况

南海慶維則堂叢譜

卷二

藝文

完

無情者不敢盡其辭乎吾見爲知縣者心欲行之事乃攘之一人明之百人罔之民寃而不知身勞而無補甚矣其難也道光六年廖君羽皋成進士以知縣分發山西釗問其所以爲知縣者羽皋曰山西民樸俗儉雖號易治吾將以勤應之釗曰何如羽皋曰吾上事則請大吏非有故及朔望無上謁日坐大堂以弊訟者令民得縱觀吾將望其顏色以徵吾得失小事立喻解之若需人證則令至者取保候於外與未至者期三期不至以負論務在徒不擾民訟不踰旬庶幾民業安乎於是巡稼於郊置倉於社積書於學迪士於古爲之父母爲之師傅興其利革其害惟便民之事是圖非敢謂能也惟是不自佚豫畧盡吾職云爾

劄聞其言而趨之古者爲吏之道三曰清慎勤羽舉未成  
進士時故貧有鄉人某以訟不克欲啗以利求助者輒謝  
絕之不顧其立身旣清矣今志於勤民又如此異日上官  
臨政慎而行之不見知縣之難爲而無負乎重權之寄者  
其在斯乎其在斯乎於其將行序以贈之用爲將來之券  
六月二日愚弟曾劄撰

送羽皋同年親家赴任山西序

馬福安 止齋

修已而後可以治人古今一也人生而有欲其愛惡之相牽喜怒之相勝哀樂之相詭者恒偏邪錯出於其間不善治之內以病其身外以妨於人如是而欲其經世宰物舉偏黨反側之人情咸維匡調娛焉吾知其難也故善治已者如良醫之治病審其疾苦辨其輕重攻其客感培其正氣使吾身渾然大和而絕無疾痛疴癢之或作也斯爲良醫爾矣吾身者民所受治也然民之病比吾身爲疎遠而有間矣其情勢之難調又非若吾身之可以自主也吾身關切之病吾不急自治之則吾民之疎遠而肯急其病過於已病乎吾之病吾可以自治而猶畏其難則吾民良莠

南海廖維則家譜

卷二

藝文

空

之不一者欲盡移其心以歸於善更未易易也余少志用世而讀書寡得學道無成行年三十有九吾身之罪咎不勝指數也乃欲出而理人愈疎濶矣猶幸頻年偃蹇得以息影蓬廬潛心思過以庶幾於不負吾身者異日或可不負吾民矣乎羽皋與余同舉於鄉繼成進士出令山西讀書學道之功勝余遠甚其治人也必將本其修已者以陶吾民吾見士服其教民安其令上以德化下下以忠事上明道晉城橫渠雲巖之治吾爲羽皋期之若夫簿書錢穀刑名功利俗吏皇皇以爲報最者吾知羽皋必且夷然不屑而深有味於余之言也已

羽臬廖老父母宰襄德政序

李鎔經

維我邑侯羽臬廖老父母蒞政之四年爲道光十有二年歲次壬辰是秋襄邑大稔米石錢至萬市價猶騰踴縣堂男女闐溢千百至不可出入仰食待命我侯嘆曰嘻甚矣億亟請發倉廩權假貸又自出穀百十石助之未已也復設法令富民捐輸或數百金以至數十金有差托幹練人董其事買米置器立厰煮粥每晨散給貧民至午乃止城關各厰各給鄉鎮各捐各賑或粥或米或錢分給從便至春三月菜甲樹莢可資接濟乃止州人之分金來助者爲酌大小村庄貧寡戶口無不遍及我邑侯於茲役亦勞且瘁矣方米價之騰沸也時訪市僧價昂則抑穀轉徙物詘

則弛禁招集輕重節宣曲深體卹至愚民作奸鬧市玩法則切爲曉諭若殷實繁冗量加裁減無不深合人心故下令如流水也先是我邑侯之來蒞也邑人士以邑志宜修尊經閣宜建請侯曰事可徐議乃作修志序例徵考驗時稍稍哀集躬親檢閱指示切要事有據者存之言可疑者闕之惟務簡約毋失蕪瑣要以有關地方爲定以康對山武功縣志爲圭臬迨蒞政之七年乃議建尊經閣旣作序行縣先自捐廉俸百金以倡邑人亦多出百十金以應者乃爲定基址揆法度以此關一方文運堂宇宜大簷桷取高閣成後購書數十種嘗言經史通考士人皆宜備覽此乃學問之根柢政事之體要目不覩全書而自命爲讀書

人沾沾科名未足爲學也嘗與州主李榆村先生講象山陽明之學每語人曰學在自心得不可專靠傳註作生活徒拾前人牙後語嘗於夜分憶少時所讀書每有獨見輒欣然自樂乃作大中論孟及書詩講義春秋講義尙未竟又謂陽明心學未可爲非是其源出象山象山主尊德性陽明以道問學卽尊德性功夫何嘗廢學卽晦菴亦何嘗不重尊德性今修尊經閣正要人知求經於心非舍心而徒求之經也經之原本在心若執硬本子便說是經可乎今所作尊經閣記仍本陽明是我邑侯創修茲閣實有深心而事尙未葺也今年春遽膺擢遷邑人士知勢不可留製錦以書德政大畧至蒲鞭示辱泣獄求生善政惠聲

流溢州郡人之口又不獨襄人之尸祝後之珥筆傳循吏者可採擇焉

知定襄縣事羽皋廖公序贊

受業趙鏞  
增生

蓋聞處不愧爲醇儒者斯能出而爲循吏理故然也粵自  
戊子羽皋廖公以解元進士宰於晉昌當榮任之始卽召  
諸生講學於明倫堂本樂道之心更延紳士創建夫尊經  
閣政事之暇手不釋卷學探孔孟之間奧理勘程朱之精  
英五經四子之書俱深講說諸子百家之訓莫不研窮倘  
所謂信篤醇謹長於文學者非歟彼三校晉闡得才最盛  
五考童試秉正無私其精於文藝又道學之餘技而非其  
所專尙耳若夫刑清政簡垂簾而鼠雀無爭澤厚恩宏保  
障而士民戴德月明星爛花村無吠夜之死雨霽風光綠  
野來驅耕之犢風化賴以導揚信有符於三善三異黎民  
南海廖維則家譜 卷二 藝文 齒

勤其撫字允無忝於慈父慈君大抵本學道之深衷爲愛  
人之善治也嗚呼甫去晉陽旋傳化鶴齋青錢以相送何  
能選受一文具薄饌以陳情知不復餐一口凡我人民感  
德不忘豈遂無父母之恩乎用是書於錦屏遺作召棠之  
愛誌夫盛德允爲郇雨之懷贊曰

欽公之學詎止五車欽公之才元非百里其平如衡其清  
如水爲政以寬保民如子邵父杜母洵堪媲美公忽仙遊  
民失怙恃沱水汪洋蒙山秀峙公德若名與爲終始

三界廟碑記

缺名

三界古廟之建也始海邊廖氏以衛所居也今則爲闔鄉奉祀焉吾鄉河堤當西北江水之衝每夏潦漲溢神輒顯靈呵護用是報賽益虔祈禱屢應非祀典所稱爲民禦災捍患者歟自康熙辛未肇造以來歷經七十餘載風雨飄搖漸滋剝蝕諸父老因議新之一時捐金咸築鳩工庀材廓舊址而廣之爲殿庭爲廊廡爲大門而瞻拜肅矣高其閭閻厚其垣墉而苞桑固矣增廂房於左腋而司祝者有所矣經始於乾隆庚辰十月迄臘月竣事凡此皆鄉中廖梁羅諸姓所樂捐而成者也因碑記其事而並鐫助金名字於後



三界廟碑記

蔣森虞山

羊城之西百里許有仁里焉曰良寶鄉面樵嶺而帶浦海向爲廖梁羅三族之區山清水秀俗尚敦龐壬寅春余遊西樵寓此愛其風之近古也因就廖氏設帳焉鄉人謂余曰以茲地濱巨河衆山相繆每當夏潦漲發震撼堤基歲以爲患康熙辛未青龍降此鄉人卜之爲三界神君遂立廟祀之自是呵護保佑凡水旱疾疫祈禱嚮應而保障河堤尤著靈異嘗於堤中罅漏潦漬奔騰勢極危迫忽有青龍蟠繞其間護救立效卒使一線危堤障大水而無患是鄉之廬舍田疇皆神所賜子孫黎庶悉神所甯神之顯著吾鄉者其功普矣豈非所謂禦大災捍大患者乎祀而

南海慶維則彙譜

卷二

藝文

癸

崇祀且時祀誰曰不宜夫神之愛民也旣羣錫以田廬民之敬神也亦當尊其廟貌惜初基狹隘乾隆庚辰重葺畧恢其舊而久經風雨剝落堪虞乃復重拓堂廡鳩工集事規模增其式廓堂構漸以崇宏廟左爲百歲坊爲燕祉堂皆廖氏之故蹟廟成而並新之以助勝概是役也經始於乾隆辛丑臘月告竣於壬寅菊月將勒石以紀徵記於余余惟神德光照天下莫可名狀然聞嘗桑麻散步前則山色波光後則茂林修竹書聲牧唱相應村墟其父老敦族睦宗子弟尊師講學一洗都市儇薄陋習洵古之仁里哉余乃益嘆神靈之守護呵禁不祥俾一鄉之父老子弟得休養生息共樂

聖朝景運於無疆者皆神功之默相者也爰述所聞覘所見而記之首事廖杞茂梁顯樂羅沛廖元德廖昌善廖明昭咸竭力赴公督率罔懈例得列名於碑以勗後人之繼興者

文閣碑記

梁昌聖

粵稽天府文昌六星在魁前三曰貴相主理文緒爲天神之最貴精氣燭朗足以燭闇智振幽滯昭回雲漢與國家壽考作人之雅化上下合符良寶廖氏爲樵山東郭巨族考班固古今人表廖叔安及漢世廖文起皆上代鴻儒尤明天文推步之學子孫蕃衍散處中外廖氏遂爲著姓迄宋廖凝真公由河南來官嶺表卜宅於茲派衍賀豐沙圃兩鄉於今五百餘年矣宗祠地濱大河臨河建廟保障下游最饒勝概而河流發源西北每夏秋月漲潦奔騰祠之未位水深數丈前未敢與水爭地也爰立方閣于午位而未位有志未逮歲戊午族衆踴躍興築填以巨石覆

南海廖維則家譜

卷二

藝文

李

以堅土得地廣畝焉乃重構圓閣於其上閣中崇祀奎宿閣下兼奉財神規模結構境界一新夫午屬火未屬土以火生土發達暢茂有大生廣生之義焉方象地圓象天先地後天有小往大來之義焉且閣勢嵌空影臥中流矯矯如游龍出沒其文光又與樵峯雲氣相吐納吾知此鄉人士財成輔相必有蔚爲國華以符此閣之祥者額曰觀光豈徒然哉是役也經始於戊午仲春是年六月歲事捐金者若而人董事者若而人附刻碑後皆族中之能世其業者余於廖諸君誼叨親串余鄉碧霞又衡宇相望喜其落成紀茲顛末以爲廖族中興之嚆矢云

紅棉江館詩草自序

明熙 鑑湖

詩生于情情生于景情景相觸而詩作焉昔人稱姑蘇城外寒山寺情與景肖然也故論人者能訾其詩之不工而不能禁其情之不發而作詩者但抒其情之所發而不暇計於景之未工吾家臨浦水面樵山環村紅棉數十樹皆數百年物每花明春晝雲蔚霞蒸與古榕長松交柯爭長雜出江天之外望之如山陰道上接應不暇而吾之江館適當其間因自署爲紅棉主人主人無他好獨癖于詩當佳辰令節春冶風融開軒命酌倚樹低吟雖鉅罄宿春室人交謫晏如也恨少失學日不破萬卷無以舒胸臆慕古人登涉名山大川足助椽筆遂踰嶺嶠走吳越北抵幽燕

南海庵雜則彙譜

卷二

藝文

九

往返萬餘里經歷十寒暑每江山勝概景物暄妍情難自已悉託于詩然心荒廢并求一字之與景相肖者恒不可多得乃知無源之水不可與江河同日語也今遠老江村紅棉猶是江館猶是而主人之詩曾無進境殊愧于斯花斯館多矣雖然宿瘤之醜旣難割愛敝帚之享何論貽譏聊檢巾箱積帙錄爲一卷旣不足爲外人道又不忍遽覆醬瓿也姑違之紅棉江館可乎

弛烟禁議

廖 姓

蓋開治民猶治水也當涓滴之小流塞之尙易爲力若既盛大流行欲強而遏抑之鮮有不橫潰者矣故善治水者能因而疏之以爲我利不善者強而阻之而成大害如今日之鴉片是也夫鴉片之入中國久矣當初到之時欲禁絕之不過煩一文告耳今則遍行天下矣 朝廷慮其流毒欲重法而禁絕之實愛民之厚意也不知禁之也愈嚴而行之也愈盛豈生民之嗜欲日開氣運使然誠不可解之故耶方今天下民窮財盡至矣極矣 國家之寶用莫如紋銀法制紋銀一兩當錢千文至今市價則每兩易錢至二千二三百之多非錢之多銀之短也銀短則百姓之

錢糧艱於完納州縣之征解每至虧遲帑庫之度支愈形不足竊聞烟價每歲出洋者有三千餘萬之多天下雖大安能當此年年消耗乎又聞廣東向來銀價尙平一二年閒銀價頓貴問其故則云夷人由江浙路以火船運烟價錢至粵錢多賤售之故可見內地之紋銀消耗漸盡卽錢亦漸散也夫立法貴奉行也問今日之天下有一處不流通鴉片者乎有一地方官肯認真辦鴉片者乎法立而不行則百姓玩法玩法則 朝廷之權替徒使奸民得以爲資行旅則藉端搜查因便攘奪胥役則栽贓詐財愚民受欺其最甚者烟販過境慮搶奪則招習強徒聚黨千百人持械逞兇爲之包送地方不敢攔阻問此等匪徒有不滋

釀事端者乎古人云利不十不變法害不十不易制董子  
曰琴瑟不調必解而更張之爲政不行必變而更化之爲  
今之計莫如弛鴉片之禁如烟酒然聽民自食聽民自種  
而收其稅內地產則烟價日賤夷人不獲重利將見來源  
日少外患可除矣要之此種惡物嗜者自嗜不嗜者自不  
嗜如飲酒然不能相強雖然鴉片之害有癮病者令人軟  
弱不堪任事應請定例凡在百官吸食者革職兵弁吸食  
者革退士人吸食者不准應試如是更定法制庶銀價可  
漸平 國課可先登民困可日甦也